

# **Diversche refereynen ende liedekens, uut Hollant, ende Zeelant**

**van verscheyden beminders der Consten ghelesen, ende  
gesonghen, inde Heerlijcheyt van Heenvliet, Ten  
versoecke van Peeter Sterlinx, den derden September  
1580**

**Pieter Sterlinx**

## **bron**

Pieter Sterlinx, *Diversche refereynen ende liedekens, uut Hollant, ende Zeelant van verscheyden beminders der Consten ghelesen, ende gesonghen, inde Heerlijcheyt van Heenvliet, Ten versoecke van Peeter Sterlinx, den derden September 1580*. Fransoys van Hamelinghen, Antwerpen 1582

Zie voor verantwoording: [http://www.dbnl.org/tekst/ster010dive01\\_01/colofon.php](http://www.dbnl.org/tekst/ster010dive01_01/colofon.php)

© 2013 dbnl

*dbnl*

Diuersche Refereynen. Wt Hollant, ende Zeelant, van verscheyden beminders der Consten ghelesen, ende gesonghen, inde Heerlijcheyt van Heenvliet, Ten versoecke van Peeter Sterlinx, den derden September 1580.

Opde vraghe, Int Wijse:  
VVat menschen treurich leven, en vrolic steruen.

Op de waghe, Int Amoureuse.

VVaer wt de Liefde, haren oorspronck heeft?

Ouden Reghel.

Lydt deen des anders fouten, zoo kent ghy v seluen.

Ende het Liedeken:

Hoe het Nederlant eertyden gefloreert heeft.

Ende hoe desolaet tselue nu leyt.

Seer Lustich om Lesen ende om Singhen.

Castijt sonder verwijt.

***Edele, erentfeste, VVyse, ende seer discrete Heeren, myn Heeren den Gouuerneur, Schouten, Commoignimeesters, Schepenen, Dekenen, Ghesworene, Tresoriers, ende Raedt der stadt Mechelen.***

*Edele, erentfeste, wyse ende seer discrete Heeren, also eenighe ionghe Practesyne inde Conste van Rethorica, binnen den Lande van Hollant ende Seelant, hoorden dat ic van meeninge was te vertrecken, soo synder vele niet te vreden gheweest, alsoo van my te scheyden, off ick heb haerlieden moeten belouen, dat sy van my soudent ontboden werden op zekere vraegen ende regele, waermede sy haeren Constrijcken gheest van Rethorica mochten werckende scherpen, ende alsoo ghesamentlyck metten anderen een vriendelycke afscheyt nemen, waer in ick haer lieden te wille geworden sy, ende heb eenige gheesten (mitsgaders ettelijck Cameren van Rethorica) beschreuen binnen de heerlijkheyt van Heenvliet, al waer wy metten anderen lieffelijck inde Conste gehandelt hebben, ende zoo voorts vanden anderen orlof ghenomen. Nu nademael Eersame Heeren, dat dese Parnasche Groeskens, gheweest zijn mynen Adieu by alle Mercurialiste ende Const beminderen, binnen ettelijcke plaetsen van Hollant ende Seelant, ende dat uwer E: ghelieft heeft, my voor uwer E: (ende der gemeenten) dienaer aen te nemen, zoo en heb ick niet kunnen ghelaten de selue Conste onder uwer E: naeme*

*in druck te gheuen, ende uwer E: tot eenen willecom toe te dediceren. Niet twyfelende  
off uwer E: en sal de selue onder uwe Protectie nemen, ende dese cleene saecke my  
van besten houden, ter tijt toe, dat den Almogenden Godt gelieuen sal, dat ick uwer  
Eer: met wat meerders congratuleren can, VVt onse studium te Mechelen, desen  
lesten Iulij 1581.*

*uVVer E: goetvilligen Dienaer  
Peeter Sterlinx*

**Totten Leser.**

My dunckt dat ic alree, Momus aenschouwe,  
 Berispende neerstich elck dinck bysondere,  
 Geboren sonder vader, *vanden* nacht soo ic houwe:  
 Om dit werc te berispen, van bouen tot ondere  
 Seggende eat hier toch wert gepresenteerd voorwondere  
 Een alsulcken Hoochwaardigen Magistraet?  
 Meent ghy dat zy sullen achten, ic sijt oorcondere,  
 Eenich van dese Grillen, seer sierlijc van daet  
 Ghy Presenteerden veel beter delicaet,  
 Saecken die Wijsheyt, ende Raet, voort brachten,  
 Off yet dat verquichten haer gemoeden desolaet,  
 Die door Mars by na hebben verloren haer crachten,  
 Dit hoor ic hem spreken: wie weet noch zijn gedachten?

Ist waer Momus? v schimpen kent een ieder wel,  
 Maer ghy en onthout der gheleerde sententie niet,  
 Die daer seet, dat hy noyt en las schriften soo fel  
 Hy en vant daer wat in, dat stichten siet,  
 Soo salmen oock in dit Cleen stucxken vinden iet  
 Dat stichtinge bringt, en den geest verfrayt:  
 Diet nu niet en dient, als hijt wel heeft doorwiet  
 Die sal op een ander tijt, daer mede zijn gepayt  
 Dus Momus, ist al verloren ghecrayt  
 Ic heb soo stout gheweest, dat ick den Raet eerbaer  
 Dit heb gedediceert, al ist cleen in consten versprayt  
 Tot een verbeteren ick seghe v eenpaer  
 Want die geeft dat hy heeft, is niet te eyschen voorwaer.

**Tot alle const beminders.**

Al hoorde hier Pan met zijn grote fluyt  
Op gheblasen teghen Appollo spelen,  
Ick bidt v broeders zijt niet soo ruyt  
Dat ghy int Oordeelen Midias wilt vervelen,  
Nemet toch int goede, wilt fouten helen,  
Om ij. oorsaecken, weerdich t'aenmercken,  
Dierste dat lust om leeren, Onuerstant doet quelen,  
Het tweede, dat eenige noch zijn ionge Clercken  
In dese conste, alst blijkt aende wercken,  
Vande geesten uyten Lande van voren  
Men bout niet op eenen dach huysen, en kercken,  
Niemant en is oock met de const gheboren,  
Want ongebouden acker, draecht selden goet coren.

## **Sonnet totten Leser.**

Hier sult ghy sien, wie de Prijzen zijn gegeuen  
O Leser! dus merct, oft daer recht is gheschiet  
Vraechdijt ons? moecht ghy antwoorden onder sneuen,  
Die daer selfs als rechter hebt gheseten siet?  
Dan dat ontken ick, vaet mijn bediet  
Ouermits de verwaenthey. diet my beletten,  
Want zy ordeelde met sulcke gunste doorspiet,  
Dat zy gaudeerde, en ander Stelden wetten.

### ***Inden eersten, vande Vraghe int vvijs.***

Den Aeckerboom van Vlaerdingen, den Oppersten.  
De Vreuchden Blom vanden Briele, den Tweeden.  
De Accoleyen van Rotterdam, den Derden.

### ***Vande Vraghe int Amouereus.***

De Roode Roosen van Schiedam, den Oppersten.  
De Accoleyen van Rotterdam, den Tweeden.  
De Vreuchden Blom vanden Briele, den Derden.

### ***Opden Regel.***

De Roode Roosen van Schiedam, den Oppersten.  
Den Aeckerboom van Vlaerdingen, den Tweeden.  
De Accoleyen van Rotterdam, den Derden.

### ***Van het Liedeken.***

De Vreuchden Blom vanden Briele, den Oppersten.  
De Roode Roosen van Schiedam, den tweeden.  
De Nardus Bloeme van Swartewael, den Derden.



***Vande Meeste Menichte.***

De Violieren vanden nieuwen Horen, den Oppersten.  
De Vreuchden Bloeme vanden Briele, den Tweeden.  
De Nardus Bloeme van Swartewael, den Derden.

***Vande Sotten.***

De Vreuchden Bloeme vanden Briele, den Oppersten.  
De Violieren vanden nieuwen Horen, den Tweeden.  
Den Aeckerboom van Vlaerdingen, den Derden.

**Met minnen versaemt. Rotterdam. Refereyn.**

Fantasije brengt my tot moeyten der sinnen  
 Om een materij te vinden op dees vraech verheuen  
 Veel ouer denckende, int herte binnen  
 Wat menschen vrolijk steruen, en truerich leuen  
 Soo heb ick mijn solutij hier op ghedreuen  
 Die vervolch lijden, hoort het verclaeren  
 Om den naem des Heeren soomen vint beschreuen  
 Ghelijck Moyses van Pharo heeft moeten verhaeren  
 Inder Woestijnen wel veertich iaeren,  
 En van zijn eyghen volck ghehadt veel lydens groot  
 En ueruolghing twelck hem soo ghing beswaren  
 Dat hy wel begheerden te steruen de doot  
 Alsulcken menschen truerich leuen, verstaetet bloot  
 En in steruen zy haer blylijck houwen  
 Die vervolch lijden, en vast betrouwen.

Die vast betrouwen, en veruolch lijden  
 Die steruen altesamen vrolijck inden gheest  
 Want zy haer in goede wercken verblijden  
 Soo datse voor gheen doot en zijn bevreest  
 Ghelijck die Propheet Esaias heeft gheweest  
 Die zy met een saech ouer midden ghinghen saeghen  
 Ieremias ghesteenicht, soomen leest  
 En Sacharias moest oock den doot verdraeghen  
 Om dat hy Twoort Gods, had in zijn behaeghen  
 En niet op en hielt te straffen haer sonden  
 Sommighe zijn metten sweerde gheslaghen  
 Al om datse die waerheyt wilden vermonden  
 Dese leuen truerich tot allen stonden  
 En zy verblyen haer int gaen nae der doot t'aenschouwen  
 Die veruolch lijden en vast betrouwen.

Samuel en Daidt die op Godt betrouden vast  
 Hebben oock ghevlucht, en veruolch gheleden,  
 Van Sauls tirannicheyt den wreeden gast  
 Iacop wert veruolcht van Esau meden  
 Ioseph van zijnen broeders, verstaet dees reden  
 Dese leefden truerich, en waren in verdriet  
 Heliass badt Godt wilt mijn ziel vant lichaem scheden  
 Doen hem Iesabel ghinck veruolghen siet  
 Songhen die drie Ionghelinghen inden houen niet?  
 Om haer vast betrouwen, daer zy op bleuen staen  
 Ghelijck Stephanus die hem steenighen liet  
 En ghinck als doen zijn ooghen oppewaert slaen  
 Ia sach door den Hemel Godts glorie aen  
 Alsulcken steruen vrolijck sonder benouwen  
 Die vervolch lijden, en vast betrouwen.

Den oppersten Prince die bouen al is  
 Worden oock veruolcht met zijn Propheten  
 Waer dat zy quamen, zy waren inden val wis  
 Heen veriaecht, dander doot ghesmeten,  
 Sommighe ghevanghen, met veel tormenten beseten  
 Dit leden zy al blijdelijck, soo die schrift wt leyt  
 Wie Christus voetstappen volcht, en wert verbeten  
 Voor die, heeft Godt d'eeuwich leuen bereyt  
 Ghelijck als die Apostel Petrus seyt  
 Dus steruen zy vrolijck die Godt acht en eert  
 Lijt en verdraecht, en die waerheyt ontspreyt  
 Ghelijck Paulus in Asya was ghetempteert  
 Met droefheyt soo dat hy hem tot steruen heeft verneert  
 Dus leuen zy truerich, en op Godt bouwen  
 Die veruolch lijden, en vast betrouwen.

*Hope troost my.*  
*per VVael.*

***Met minnen versaemt. Refereyn.***

Och hoe ist verdrayt // door groot opruer // siet  
 Ick heb gesayt // maer ten heeft geen duer // siet  
 Het wort my ghenomen // ende berooft // al  
 Ic wort af gedrayt // van goet en schriftuer // siet  
 Het welck my becayt // en maect in ghetruer // siet  
 Och tis ghecomen // door menschen my ghelooft // al  
 Die welcke my met ghewelt hebben verdooft // al  
 En maecken dat ick ben in grooter allenden  
 Want veel my hebben ghehouwen, en gheclooft // al  
 Och waer sal ick my van benautheyt wenden  
 O cost my nv iemant die doot toe senden  
 Hoe blijijck sou ick comen om daer te volenden  
 Want ic en weet niet te comen vanden eenen brooden  
 Noch tot den anderen, in het enden  
 Dus eerlijcke armoede, sterft duysent dooden.

Die my heeft ghemaect // seer wel zijn woort // hout  
 Want mijn hert nv blaect // dan den mensch hem dus hout  
 Ick wou wel steruen // maer Godt wil dat ick lyen // sal  
 Nu ic hebt geraect // dat den mensch hem dus discoort // hout  
 Tegahens my staeckt // en alle duecht versmoort // hout  
 Ic moet vruecht deruen // en druc ic noch meer lyen // sal  
 Want my noch veel drucx en droefheynt gheschien // sal  
 Och sal my die doot noch niet ouer comen  
 Want die truerich leeft, tegens die doot niet stryen // sal  
 Ick mach teghens dit ghewelt wel schromen  
 Sy nemen alle mijn goet tot harer onvromen  
 Och mijn vruecht wort my gans af genomen  
 Dus mach ick wel claeghen als den blooden  
 Want ick ben nv al quijt dat stont vol schoone blomen  
 Dus eerlijcke armoede, sterft duysent dooden

O truericheyt groot // die geen bitterheyt beclaecht // nv  
 Dis ooc ghy foot, my van hier wech draecht // nv  
 Wat hebt ghy ghewrocht // nv met al v treken // fijn  
 Dat ghy my dus bloot // hebt al veriaecht // nv  
 En ghenomen minoot // dat v behaecht // nv  
 Tis op my versocht // o Godt wiltet wreken // fijn  
 Sal noch tot die doot iet ontbreken // fijn  
 Want ick moet steruen duisent dooden voorwaer  
 Want ic ben van al mijn goet versteken // fijn  
 O Godt sult ghy my noch niet by v halen claeer  
 Sy willen my nu vernielen int openbaer  
 Want mijnen hongher dien ick heb valt my soo swaer  
 Ouermits zy ons houden argher als Iooden  
 Mijn kinderen steruen van hongher eenpaer  
 Dus eerlijcke armoede, sterft duysent dooden.

*Prince*, toont v werck // tot goeder affextie // al  
 Want in v perck // is een groote delectie // al  
 Want door uwen haet // moeten wy sneuen // noch  
 Hout v gheloof sterck // en in goede protextie // al  
 En als een clerck // toont v perfextie // al  
 En hout geen valschen raet // om ons te doen beuen // noch  
 Want wy worden benomen tgoet iae ons leuen // noch  
 Want alle menschen nu malcanderen haten  
 Ende maecken dat ick ben verdreuen // noch  
 Hoe wel ick den deucht nu gaen aenvaeten  
 Ten mach my in mijnen hongher niet baeten  
 Want mijn kinderen gans van hunger praeten  
 Och doot wilt hier toch comen, ghy zijt hier van nooden  
 Want ick in bitterlijck lijden my blye heb ghelaeten  
 Dus eerlijcke armoede sterft duysent dooden.

**Refereyn.**

Ick ben seer ghequelt met fantasyen  
 Om dat my onlanx is gheopenbaert  
 Een questie, die ick voor u hier sal belijen  
 Waer door mijn herte is gheweest beswaert  
 Maer om te thoonen Retorices aert  
 En solutie te gheuen, om sprijs verweruen,  
 Op dese vraeghe seer wijselijck verclaert  
*Wat menschen treurich leuen, en vrolijck steruen*  
 T'zijn Godts wtvercoren die zijn rijck sullen eruen  
 Want zij daghelijcx lijden om zijn Goddelijck woort  
 Dese woorden veracht als ghebroken scheruen  
 Hier by deser werelt met groot discoort  
 Dit doet haer treurich leuen, soot wel behoort  
 Maer tot een vrolijck steruen sullen zy haer weeren  
 Die daghelijcx lijden, om twoordt des Heeren.

Christus spreeckt ghy sult treuren en schreyen  
 Wanneer die werelt sal vrolijck wesen,  
 Maer wilt uwen tijt, met lijtsaemheyt verbeyen  
 Soo sult ghy worden van druck ghenesen,  
 Dus trueren zy daeghelijcx, die den Heere vresen  
 Soo langhe zy hier opter aerden leuen,  
 Want al wat werelt is, wordt van haer mispresen  
 Dus en moghen zy haer tot gheen meucht begeuen,  
 Maer peysen altijt om dat schrickelijck leuen  
 Wanneermen sal hooren der Trompetten geschal,  
 Staet op ghy dooden, als ons is beschreuen  
 En coempt ten oordeel ghy goede en quaede al  
 Dit doet haer trueren naer Ieronimus verhal  
 Dus zijn dit de ghene, naer mijn solveeren  
 Die daghelijcx lijden, om twoort des Heeren.

Die haer leuen nae Godts woort hier stellen op aerden  
 Sullen zijn die bruyt Christi, dat is waerachtich  
 Sy leuen in suyuerheyt, trueren zy aenvaerden  
 Met eenen ootmoedighen Geest zeer weerslachtich  
 Door tgheloof in Christo, en zijn ghenade crachtich  
 Dees zijn ghewasschen door Christus bloet van sonden  
 Sy houden haer reyn, weest dit ghedachtich  
 En soecken Godt te behaeghen tot allen stonden,  
 Sijn Goddelijck woordt, zij altijd vermonden  
 Waerom zy veel lijdens op aerden draeghen,  
 T'coempt door zijn heylich woort, twoort v ontbonden  
 Maer zy wachten haer verlossingh tot allen daeghen  
 Met weenen, en trueren, om Godt te behaeghen  
 Dees sullen vrolijck steruen, naer Paulus leeren  
 Die daghelijcx lijden, om twoort des Heeren.

***Prince.***

Dese haer zeer vrolijck tot sterue vueghen,  
 Want zy hebben haer tijt met treuren verwacht  
 Met die Enghelen Godts, sullen zy haer verhueghen  
 In dat Nieuwe Ierusalem met heerlijcke macht  
 Daer Godt met haer sal wonen, hier wel op acht  
 En hy sal haer Godt zijn, soo Ioannes belijt  
 Sy en sullen niet meer wonen dach noch nacht  
 Want vande tweede doot zijnse bevrijt  
 Die traenen worden zy van haer wanghen quijt  
 Sy sullen als ghemeste Calveren springhen,  
 Dese zijn van eeuwichheyt ghebenedijt  
 Want zy gaen met Christo d'enge poort door dringhen  
 Heylich, Heylich, is hy, sullen zy singhen  
 Want haer weenen sal in blijschap verkeeren  
 Die daghelijcx lijden, om twoort der Heeren.

*Aensiet die Ionckheyt.*

*Schiedam.*

**Refereyn.**

Hoe vele diuersche Godts geest haer beroemen  
 Malcanderen door gebruijc *van* Religie verdoemen  
 Recht of die salicheyt hinc aen een wterlijc pant  
 Dat zy niet en doet ant:  
 Wt die gront des herten, moet die duecht voortcoemen  
 Dan die Ioden wilden oock haer heylich noemen  
 Om die besnijdenis dien zy hielen vaillant  
 Maer Godt die bevant  
 Haer herten onbesneden, dus sloech haer Godts hant,  
 Want die reyne van herten sullen Godts rijcke eruen  
 Dus wert nu ghevraecht met cloeck verstant  
*Wat menschen truerich leuen, en vrolijck steruen*  
 O Godt laet mijnen geest daer verstant *van* verweruen  
 Heere naer u woort soude ick daer voor achten  
 Want ghy sult daer in eeuwicheyt niet bederuen  
 Die herboren door den geest, Godts rijck verwachten.

Die herborene Godts, zijn niet vleeslijck gesint  
 Vyanden des werelts is datmense vint  
 Soecken hier ter doot haer sondighe leden  
 Voor den gheest te treden,  
 Sy haer men niet eerts, maer wat hemels is bemint  
 Den gheest in haer alle aenvechtinghe verslint  
 Om den dach des verlossinghe wert by haer ghebeden  
 Om te rusten met vreden  
 Inden Heer, want zy weten dat hier beneden  
 Der Christenen leuen, niet is dan eenen strijt  
 Doende als Godts kinderen, vant beghin oyt deden  
 Niet soeckende dan dat Hemels is altijd,  
 Want die doot is eenen doorganck, dies zeker zijt  
 Tot den leuen: voor Christelijcke ghedachten,  
 Omm te Christo in zijn Rijck te worden verblijt  
 Die herboren door den geest, Godts rijck verwachten.



Die herboorte en compt inden water niet,  
 Maer wt den water, die Godts kinderen geschiet  
 Inden Gheest van Godt den almachtighen vader  
 Haer drucx ontlader:  
 Die haer tot Christum trect, dus wat Christus gebiet  
 Sy haer men inde cracht volcomen siet  
 T'rijcks niet int woort, dus Godts kinderen te gader  
 Wt vierigher aeder:  
 Inde cracht des woorts, haer tijt comen nader  
 Verlangende na themelsche ewich wesen,  
 Elck is van haer een wellust versmader  
 Wetende dat Christus van der doot is verresen  
 En dat sullen verrijsen, zijn wtgelesen  
 Die haer offer oyt tot hem recht op brachten  
 Dus leuen treurich, en steruen vrolijck door desen  
 Die herboren door den geest, Godts rijck verwachten.

**Prince.**

Den eenighen Prince Christus die sal gheuen  
 Al die dus volstandich in hem zijn ghebleuen  
 Als zijn vaders beminde wtvercoren  
 Sijn rijcke te voren  
 Tot zijn rechter handt sullen zy op zijn geheuen  
 Want zy staen int boeck des leuens gheschreuen,  
 Dus den arbeyt en sal dan niet zijn verloren  
 Vanden weder gheboren,  
 In welcke men hier tribulatie ach sporen  
 Want zy met Christo haer Cruyce hier draghen  
 Verblijden, als die doot tlichaem compt verstoren  
 Soeckende alleen den Heere te behaghen,  
 Ick segghe swerelts lusten achter in voor plaeghen  
 En met die doot zy haer pijn versachten  
 Mits alleen naer den dach Christi vraghen  
 Die herboren door den geest, Godts rijck verwachten.

*Aensiet die Ionckheyt. Schiedam.*

**Refereyn.**

Ghy alle die hier Christus Naeme wilt draghen  
 Neemt v Cruys op den hals, en weest niet verslagen  
 Soeckt Godt te behaghen  
 Hy maeckte onsen Hertoch daer door volcomen,  
 Dus oeffent hier onder het Cruys v daghen  
 Wilt vlees, bloet, en goet, voor Godts Naeme wagen  
 Soo na den prijs iaeghen  
 Laet des vleeschs lusten in v gantsch zijn benoemen  
 Snijt die werelt af, die Godt sal verdoemen  
 Laet t'oude Serpent, v gheensints bederuen  
 Tis listich, en derf hem seer veel beroemen  
 Wat segt Schriftuer, van die Godts rijck sullen eruen  
 Sy moeten treurich leuen, en vrolijck steruen  
 Dees menschen wilde Christus Nicoderno wijsen  
 Sijn verborenen Godts, welcke flvees lust af keruen  
 Sy ghelooouen door den gheest, tglorieus verrijsen.

Dus des vlees wercken door den geest toch hier doot  
 Om te leuen met Christo, in glorie groot  
 Die Heere minioot:  
 Vernielt d'ouden Adam, wilt den nieuwen aentrecken  
 Strijdt als Christen Ridders, vreest, gheenen aenstoot  
 Neempt ter herten, hoe die Heere zijn bloet vergoot  
 Doende cloeck t'exploot:  
 Om onse misdaden te moghen bedecken,  
 En is verresen, om ons te verwecken  
 Nu diens gheest, die sulcx in hem heeft bewesen  
 [...] niet ons, dus wilt v Heere strecken  
 [...] zijnen Naem want zijn wtghelesen  
 [...] treurich leuen, en steruen vrolijck door desen  
 [...] zy sullen met Godt veriolijzen  
 [...] zijn die weder gheboren Godts, by Godt gepresen  
 [...] ghelooouen door den gheest, tglorieus verrijsen.

Onder tCruys, hebben hem Godts kinderen begeuen  
 Eenen ghestadighen strijt wert by haer ghedreuen  
 Om te vercrijghen tleuen,  
 In eeuwicheyt by Godt dat zy verwachten  
 Voor die tijtelijcke doot, zy niet en beuen  
 Soecken met Christo te werden verheuen  
 Dien zy aenleuen,  
 En in Christo zy oyt die doot t'onder brachten,  
 Met die doot te steruen, zy die doot versmachten  
 Werden t'lichaem ontlost, naer des gheests begheeren  
 Dus broeders wilt daer met vlijt op achten  
 Wat menschen hen ter werelt treuren gheneren  
 En met een Christen ghemoet haer occuperen  
 Vanden doorganck des doots, Godt loffelijck prijsen  
 T'zijn herborene Godts, niemant en mach haer deren  
 Sy gheloouen door den gheest, t'glorieus verrijsen.

Als den Prince Christus, treurich heeft gheleden  
 Ende noch voor zijn vyanden ghebeden  
 Die hem misdeden,  
 Alsoo dat rijcke inghenomen met ghewelt  
 Soo ist dat zijn kinderen, hem hier na treden  
 Want by haer moet, soo wel als by hem zijn gestreden  
 Sullen zy met vreden  
 Triumpheren int rijcke, dat voor haer is ghestelt,  
 Want die victorie hier int Cruyce ghelt  
 Om t'rijcke der Hemelen te moghen winnen,  
 En wie niet herboren is, werter niet ghetelt  
 Om tot het Rijcke te moghen comen binnen  
 Dus verstaet hoe treurich leuen, edel Christen sinnen  
 En vrolijck steruen, om haer siele te spijsen  
 Die herboren Godts, want Godt zy beminnen  
 Sy gheloouen door den geest, t'glorieus verrijsen.

*Aensiet de Ionckheyt. Sciedam.*

**Refereyn.**

Hoort ghy menschen kinderen altesamen  
 Laet af van sonden, wilt Christelijck leuen,  
 Want doort Cruys, en lijden, oyt Gods kinderen quamen  
 Int boec des leuens te werden gescreuen,  
 Dus volcht Christum naer, wilt tvleesch lusten begeuen  
 Sterft vry inden Heere, die eewich en altijt  
 Is leuende, soo werdy naer die doot verheuen  
 Want tleuen van een Christen, is hier eenen strijt  
 Om van duuel, helle, en doot, te werden ghevrijt  
 En die victorie Christi te moghen verweruen  
 In lichamelijcke doot, haren Gheest verblijt  
 En die tweede doot, en sal haer niet bederuen  
 Dus hier truerich leuen en vrolijck steruen  
 Die herboren menschen, naer schrifs bewijsen  
 Die ghelooouen in Christus glorieus verrijsen.

Die staen om met Christo te verrijsen in glory  
 Strijden met den schilt des gheloofs hier perfect  
 Verlanghen naert d'eynde op dat zy victory  
 Moghen beuechten, en d'aertsche hutte beulect  
 Mach weder inde aerde werden ghestrect,  
 En vernieut daer naer, in een eewich wesen  
 Voor Christum, ter glorie van der door verweckt  
 Die den eersten is, daer toe wt ghelesen  
 En dees Medecijn-meester, sal haer ghenesen  
 Van die wonde des doots, waerom zy met treuren  
 Hier leuen, ia Christus seyt selfs van desen  
 Die volstandige ten eynde sal t'rijck ghebeuren  
 Dus dit zij die herboren leuen, vol doleuren  
 En steruen vrolijck om haer ziel te spijsen.  
 Die ghelooouen in Christus glorieus verrijsen.

Het verrijzen glorieus zy in Christo soecken  
 Door wien men alleen mach tot den Vader comen  
 Waerom sy hem het Cruyce te draghen vercloecken  
 Wetende dat t' Cruyce moet op zijn ghenomen  
 En Christus gheulocht, sonder door te schromen  
 Inden gheest soeckende, alleen dat bouen, is  
 Om te werden bevrijt vant eeuwich verdomen  
 Dus een waer Christen weynich in vorsten houen, is  
 Godt aensiet gheen persoon, daer hy af te louen, is  
 By hem en ghelt besneden, noch onbesneden  
 Maer nieu herboorte, die vande werelt verschouen, is  
 Dus ist dat svleesch lusten hier onder treden  
 En verblijden inden doot, die herboren leden  
 Christi, door den gheest, die haer doet veriolijzen  
 Die ghelooouen in Christus glorieus verrijzen.

**Prince.**

Den prince Christus sal inde wolcken te moet  
 Den gheloouigen comen, en int rijcke halen  
 Die wt den ghelooue leuen, by wien men doet  
 Den wille des Vaders, dus sal hy haer betalen  
 Met eeuwige vreucht, en zijnen wijn wt schalen  
 Der vreuchden schencken, soo dat noyt ooc heeft gehoort  
 Sulck een melodye, maer den boosen sal dalen  
 Inden afgront, door maledictie van Christus woort  
 Dus zijn die treurich leuen, op dat soude versmoort  
 Wert door t'gheloof, dat in Christo Iesu staet  
 Met ghewisse hope ter doot gaende voort  
 Vrolijk inde liefde Christi, haren Advocaet  
 Die wederboren inden Gheest van Godt metter daet  
 Wiens naem zy eewelijck sullen prijsen  
 Die ghelooouen in Christus glorieus verrijzen.

*Aensiet liefd'.*

*Vlaerdingen.*

**Refereyn.**

Het heeft ghelieft eenighe constenaren  
 Ons Rethorijckelijck, int wijs te vraghen  
 Wat menschen haer int leuen. met trueren beswaren  
 En vrolijck steruen in haer daghen,  
 Waer op datmen veel antwoorden can gewaghen  
 Want deen mach roemen, den behoefighen altijd,  
 Dander, den Crancken, die dick treurt met vlaghen  
 De derde, den Blinden in swerelts crijt,  
 Eenighe, den Stom doouigen sonder iolijt,  
 Andere, de wtsinnighe die altijd tieren,  
 Veel voeren oock eenen heftighen strijt  
 Segghende, t/zijn dees haetnijdighe ghieren  
 Die met alle menschen twisten in veel manieren  
 Dan ick wegghe te wesen, dit wel doorsweruende  
 S'werelts afgrouw, in goeder conscientij steruende.

Om dit te bewijsen, soo moeten wy aenmercken  
 Van wie de werelt een afgrouwen heeft,  
 Dat zijn alle vrome, godtsalighe, clercken,  
 Daer voor dat zy als een misdader beeft,  
 Ghemerckt alsulcken tot deuchden exempel gheeft,  
 Die de werelt oyt haette, en altijd haeten sal  
 Dies een Godtsalich mensche, treurich leeft  
 Ende dat wt twee oorsaecken, vol van misual  
 Deerste is de boosheyte, die zy in groot ghetal  
 Voluert, teghen d'eenvoudighe die Godt vreesen,  
 Het tweede, dat soo menich duysent menschen al  
 Daer in versmoren, soo wy moghen lesen  
 En al sien sy de wonde, tis quaet om ghenesen  
 Waer deur ick schrijue, als dit eruende  
 Swerelts afgrouw, in goeder conscientij steruende.

Wat afgrouw hadden D'israheliten in veel saken  
 Tegen den vromen Moyses eendrachtich  
 Inghelijcx zy alle Propheten verstaken  
 Ia grouden mede teghen de waerheyt almachtich  
 Oock teghen zijn Apostelen, leerende crachtich  
 Als ghesonden boden, van Godt vercoren  
 Het was haer alle eenen grouwel prachtich  
 Alst noch daghelijcx is, soomen mach sien en hooren,  
 Niet dat ick segghe, dat dees duytsche doctooen  
 Die daer roepen Christus is hier ende daer,  
 Inde rechte waerheyt hebben ghesworen,  
 Want Godt sal dat noch maken openbaer,  
 Maer die eenvoudich godtvreesende zijn voorwaer  
 Daer van ick mach segghen, mijnen kerf keruende  
 Twerelts afgrouw, in goeder Conscientij steruende.

***Prince.***

Waer in een goede Conscientij ghelegen // is  
 Connen alle menschen seer wel weten  
 Soo zy treden in haer selfs wegghen // wis  
 Met eenen knaghenden worm, die altyt wil eten,  
 Want so die quaet tuycht, elc wacht hem *van* vermeten  
 Teghen Godt, die hert e nieren deursiet,  
 Maer laet hy ons ongequelt, als wy zijn gheseten  
 Om te ouerpeysen onse misdaden iet,  
 En in sonderheyt als ons de doot nope biet  
 Soo sullen al sulcke treurighe menschen  
 Vrolijk steruen, deur haer goede conscientij siet,  
 Want zy verrijsende winnen haers herten wenschen,  
 Daer de werelt afgrouw, met volle penschen  
 Dat zijn de ghene die daer zijn verweruende  
 Swerelts afgrouw, in goeder conscientij steruende.

*Corrigez sans Reproche.*

*Briele.*

**Refereyn.**

De menschen die hier // schier // treurich leuen  
 En int steruen // eruen // vrolicheynt ouervloedich,  
 Sijn van veelderhande // verstande // hier beneuen  
 Soo ic meene // is deene // in steruen vrijmoedich  
 Deur dat hy lijt // spijt // en hongher gloedich,  
 En dander is certeyn // pleyn // met siecten beladen  
 Waer deur dat wy // vry // int steruen is spoedich  
 En is vrolijck voorwaer // claer // sonder beraden,  
 Want pijnlijc nopen // doet hopen // op Gods genaden  
 Dees menschen sijn met reen // de geen // die vrolic steruen  
 Daer sijn die haer gedachten // achten // op Gods paden  
 Waer deur sy in dit leuen // beuen // en sweruen  
 Maer als haer die doot // stoot // om te bederuen  
 So comt die vrolicheynt haer // claer // verhuegen crachtich  
 Dat doet treurich leuen, vrolijck steruen warachtich.

Vintmer niet in dit Prieel // veel // die leuen truerich  
 Om al dat sy doen // coen // niet tot voorspoet wil dyen,  
 Waer om sy dit termijn // fijn // vol verdriets geduerich  
 Daerom dat // oft wat // sy doen, haer niet can verblyen  
 Want al haer geluck soet // en voorspoet // loopt besyen  
 Dus is haer leuen stuerich // en truerich // voorwaer,  
 Als wy aen veel lien // sien // als nu ten tyen  
 Men macht aen sulcke clercken // mercken // openbare  
 Datse souwen sonder vreesen // weesen // dats clare  
 Als sy het steruen // eruen // certeynlijck  
 Ia men hoort wat ick spel // wel // wert ontware,  
 Want soo haest men seyt // bereyt // v te steruen pleynlijck  
 Soo sijn sy tot dier tijt // verblijt // ghemeynlijck  
 Door dat haer leuen is gheluct // bedruet // pachtich  
 Dat doet treurich leuen, vrolijck steruen warachtich.



Wilt niet achten // dees gheslachten // van conditien  
 Die met peynsen // veynsen // altijd te sijn vol sonden,  
 Waer deur // sonder doleur // is haer petitien  
 Lieuer het steruen // te eruen // wilt dit doorgronden  
 Dan hier beneuen // te leuen // tot desen stonden,  
 Want sy sorghe altijd // in spijt // Godt te temieren  
 En door sulke practijc // Gods Rijc // hoort mijn vermonden  
 Niet t'ontfangen // maer bangen // is haer glorieren  
 Dees menschen connen int quartier // hier // nz gauderen  
 Maer truerichint verstijuen // drijuen // sy haer leuen  
 Dat doet int steruen // verweruen // vrolick floreren,  
 Want een ongherust hert, smert // daer beneuen  
 Sijn handel // en wandel // al hier ghedreuen,  
 Dit sijn die saecken // wilt dit smaecken // aendachtich  
 Dat doet truerich leuen, vrolick steruen warachtich.

**Prince.**

Alle gheesten // die hier ter feesten // sijn ghecomen  
 Neemt dit als vroede // int goede // tis mijn begheren  
 Oock is mijn bede // mede // aen alle vromen  
 Datse met een lijn // fijn // als die trueren seere  
 Maer ontgaet haer iet // siet // dat sy Godt den Heere  
 Sullen bidden met vlijt // altijd // hy sal v helpen  
 Want daer isser veel // arm en eel // die nemmermeere  
 Versaet sijn in haer moet // en goet // arme welpen  
 Dees drijft Godt // sonder spot // in haer schelpen  
 En dits de roede // sijt dit vroede // die haer quelt  
 Want een mensche // die sijn wensche // niet can stelpen  
 Die is selden gherust // maer onlust // hoe hijt spelt  
 Sijn conscientij // die penitentij // hem selfs stelt,  
 Sulcken lieden // vlieden // dit leuen prachtich  
 Dat doet truerich leuen, vrolick steruen warachtich.

*Tot vreucht geresen,  
 Swartewaele.*

**Refereyn.**

Antwoorde te gheuen op dese vraghe jent  
 Present // willen wy ons ghereet spoen  
 Met Schriftuerlijck bewijs, comende ontrent  
 Bekent // willen wijt na ons simpel verstant doen  
 Wilt doch eens hooren naer ons bevroen  
*Wat menschen treurich leuen, en vrolick steruen,*  
 Paulus schrijft den tweeden brief tot Tirum coen  
 Mijnen loop is ten eynde ick hoop te verweruen  
 Een eeuwighe croone dien ick niet en sal deruen  
 Het ghelooue heb ick behouden te hant,  
 Daerom ghinck hy in droefheyt keruen  
 Maer het steruen viel voor hem seer triumphant  
 Dus segghe-ick met woorden seer diamant  
 Die onder het Pausdom noch moeten sweruen  
 Die leuen treurich, maer vrolick sy steruen.

Die op Godt hopen met grooten verlanghen  
 Die leuen treurich hier int Aertsche crijt  
 Hoe wel de werelt hem ghewis aenhanghen  
 Tvalt den gheest banghe dies seker sijt  
 Want Paulus seyt noch met grooter vlijt  
 Heer wanneer suldy dit sondich vleesch *van* my nemen  
 Het docht hem lang te vallen desen tijt  
 Vrolijck te steruen, was wel sijn temen  
 Hy en wilde van Gods leeringhe niet vervremen  
 Sacharias beweest oock int openbaer  
 Als hy Christum sach, sprack hy sonder schemen  
 Heer laet uwen knecht gaen in vreden voorwaer  
 Die Christum willen volghen ick segt v claer  
 Die moeten *den* Roomschen Antechrist vrientschap deruen  
 Die leuen treurich, maer vrolick sy steruen.

Van Tobiam lesen wy oock seer claer  
 Doen hem openbaer zijn huysvrouwe schelde,  
 O Heer seyde hy met woorden voorwaer  
 Neemt mijnen gheest in vreden was dat hy relde  
 Sijn seluen hy ganschelijck tot den Heere stelde  
 Om te steruen was hy seer wel bereyt,  
 Nabuckodonosor die dry longhelinghen quelde  
 Om dat sy niet en aenbaden twert v geseyt  
 Sijnen afgodt dien hy hadde wtgeleyt,  
 Dies moesten sy oock naden houen treden,  
 Maer sy bleuen volstandich in volherdichey  
 Sy ghinghen ter doot in vrolijckheden,  
 Het is doch suer menich Iaren gheleden  
 Datmense in dese Nederlanden sach ter doot keruen  
 Die leefden treurich, maer vrolijck sy steruen.

***Prince.***

Prince der Princen tis wel ghebleken  
 Aen Abraham, Isack, Iacop ter stede  
 Haren gheest inwendich was totten Heere gestreken,  
 Sy hebben dlichaem besweken in vrolickheden,  
 Die twaelf Patriarchen ghingen oock vrijlick treden  
 Naer haer plaetse die hen Godt had bereyt,  
 Samson heeft den Heer met vieriger herten gebeden,  
 Heere laet my wraeck nemen heeft hy gheseyt  
 Van mijnen ooghen, O Heere gheleyt  
 Mijnen gheest in vreden, op dat men v mach eeren  
 Dat ick mijn vyanden ter neder worpe, niet en beyt,  
 Ionas heeft oock ghebeden sonder cessereren  
 Nv Heere neemt mijn siele van my, tis mijn begeeren  
 Op dat ick v Rijck mach vrolijck verweruen  
 Die leefden treurich, maer vrolijck sy steruen.

*Tspruyt wt Ionckheyt.*  
*Nieuwenhoven.*

**Hier beghinnen de Refereyen Int Amoureux. *Met minnen versaemt.***  
***Refereyn.***

Ghy aerdighe Gheesten, vol amoreushey  
 Coempt haestelijck voort, als Venus scholieren  
 Waer zijdy: Phebus // vol coragieushey  
 Die d'eerste vrijagetie maecte, suet *van manieren*  
 Met Daphaene v liefste, als Venus dieren  
 Seght my *Waer wt de liefde haren oorspronck heeft?*  
 Hipolite en Phedra coempt oock, sonder vieren  
 Ghy Paris die Aenone daer na begheeft  
 Waer zijdy Aeneas daer Dido om sneeft  
 Iason die Hipsiphille zijn lijf salueerde  
 Penelope die om Vlisses haer web ontweeft  
 Dees al haer inden oorspronck, der liefden gheneerde  
 Als elck wel weet, die van haer oyt studeerde  
 Dat den oorspronck der liefden, coemt met corage  
 Wt het aenschouwen, van een schoon personage.

Als Paris, Venus, Iuno en Pallas aenschoude  
 Vercoos hy amoreushey, voor rijcdom en verstant  
 Na dien hem belooft was, dat hy hebben soude  
 Helenam, die alderschoonste, van t'gheheele lant  
 Want doort aenschouwen *van* haer dryen, lach zijn hert in brant  
 Door Iasons visagie wert Medea ontsteken  
 Hoe wel hy haer namaels noch leet in schant,  
 Leander heeft Hero zijn lief niet besweken  
 Acontius bedrooch Cidippe loos van treken  
 Als hy haer schoonheit aenschoude, sijn hert moest blaken  
 Doort gesicht quam *den* oorspronck der liefden, gestreken  
 Als den Godt Pluto Proserpina ghinck ontschaken  
 Dees alle doort aenschouwen *inder* liefden, ontstaken  
 Dus coempt den oorspronck der liefdem, door elcx vijage  
 Wt het aenschouwen, van een schoon personage.

Als Mercurius en Phebus, Chione saghen  
 Verliefdē sy haer, ende hebbense bedrooghen  
 Hippornes hadde in Atalantha behaghen  
 Door daenschouwen van haer schoon claer bruyn oogen  
 Die welgheleerde Sappho die werde ghetooghen  
 Door tghesichte, tot liefden op Phasn seer schoon,  
 Narcissus en mochte hem niet ghenooghen  
 Te aenschouwen die schaduwe van sijn selfs persoon  
 Dien hy int water sach, hem spieghelende ydoon  
 Dies hy daer verliefde, op hem seluen sottelijck  
 Canace die spande van schoonheyt die croon  
 Dies Machareus haer beminde ongottelijck  
 Want twas haren broeder dus wast bespottelijck  
 Dus heeft die liefde haer oorspronck by elcx image  
 Wt het aenschouwen van een schoon personage.

**Prince.**

Ghy Princelijcke minnaers, amoureux van gheest  
 Die inde vryage, hebt een goet behaghen  
 Den oorspronck der liefden, soect aldermeest  
 Oft anders en condy gaer niet beiaghen  
 Doorts moet ghy v seluen, oock eerlijck draghen  
 Als ghy door v ghesicht, een hebt verspiet  
 Want d'absentij van liefs lief, doet het herte knaghen  
 Daerenteghen die presentij, blust alle verdriet  
 Gheen dinck zoo solacelijck, dan datter gheschiet  
 Tusschen twee gelieuekens, sonder violentij  
 Want buyten d'aenschouwen, ist toch al niet  
 Van een schoon personage, verstaet mijn intentij  
 Maer liefd' baert vrede, in sliefs presentij  
 Dus stel ick den oorspronck der liefden in frage  
 Wt het aenschouwen van een schoon personage.

*Liefd' baert vrede.*

*Per Yselueer.*

***Met minnen versaemt. Refereyn.***

Damoureuse gheesten o Venus dienaren  
 Geminders der persoonen wt Adam gebouwen  
 Waer deur haer die liefde eerst comt openbaren  
 Moet ick verclaren // sonder benouwen  
 Het wencken der ooghen en dlieffelijck aenschouwen  
 Doet een mensch het hert inwendich verblyen  
 Want door tghesicht van schoone vrouwen  
 Coemt de liefde den mensch aldereerst bstryen  
 Ghelijck als Leander mocht niet langher lyen  
 Hem te deruen als hy haer sach staen  
 Het ghesicht dede zijn herte tot haer vlyen  
 Als hy aenschouden haer schoonheyt seer wel ghedaen  
 Hy is dickmael snachts wt zijns vaders huys gegaen  
 Om zijn liefde t'aenschouwen die ter werelt leeft  
 Wt het ghesicht die liefde haren oorspronck heeft.

Niemand ter werelt en can liefde draghen  
 Sonder tghesicht van haer eerbaer wesen  
 Want daer wt coemt den oorspronck der liefden jagen  
 Soo datse terstont int hert is ghepresen  
 Want alleen haer schoonheyt wtghelesen  
 Doen die sinnen veranderen haestich en ras,  
 En brengt die ghedachten in grooter vresen  
 Hoe datment best soude brenghen te pas  
 Om eens by haer te comen, daer sy was  
 Want die ooghen slaepich op haer staen en stralen  
 Sy besichten al haer leden soo blanck als vlas  
 Haer wanxkens ghebloost, dmondeken root als coraele  
 Thert verheucht hem door haer wel sprekende taele,  
 Soo datmen hem terstont tot haer begheeft  
 Wt het ghesicht die liefde haren oorspronck heeft.

Onstack Paris niet als hy Helena quam ontrent  
 Van liefden die hem tot haer ginck draeghen  
 Want duer die Troyaenen quamen in torment  
 Dat hy duert ghesicht in haer kreech behaeghen  
 En noch al meer die soo vrouwen saeghen  
 Ghelijck Meleager die hem ghinck vermeyen  
 En vant spaceren in bosschen en haeghen  
 Die schoone Atalanta met haer beyen  
 Het ghesicht ghinck hem terstont tot haer leyen  
 En sprack tot haer, O schoon Maecht vol eren  
 Wat grooter gheluck sal hem Venus bereyen  
 Die ghy o Atalanta tot een man sult begheeren  
 T'ghesicht de hem door haer schoonheyt die sinnen verkeeren  
 Dat hy zijn rome seyt aent wilde verschen heeft becleeft  
 Wt het ghesicht die liefde haren oorspronck heeft.

**Prince.**

Princelijcke minnaers die Venus beminnen  
 Moeten eerst doort ghesicht aende liefde raecken  
 Eer datse can comen int herte binnen,  
 Oft die ghedachten met haer schoonheyt vermaecken,  
 Want duert gesicht moet den brant der liefden eerst blaecken  
 Ghelijck Esacas Nimphe sach staen op een riuere  
 Doen stelden hy hem tot loopen om te ghenaecken  
 Haer blanck lichaem dat hem thert de verciere  
 En haer eerbaer wesen reyn van maenieren,  
 Maer als zy hem sach, nam zy den loop veure  
 Soo langhe dat zy quam by een wilt diere  
 Dat haer terstont heel ghinck verscheure,  
 Doen hy dat sach begonst hy te treure  
 Nu beclaech ick dat ghy door my hebt ghesneeft  
 Wt het ghesicht die liefde haeren oorspronck heeft.

*Hope troost my.*

*Perwael.*

***Met minnen versaemt. Refereyn.***

O Venus claer // voorwaer // hoe gady my omringen // ras  
 En Cupido eenpaer // daer // my gaet dwingen // ras  
 Sal ick op dit termijn // sijn // in v behagen // niet  
 Noch comen naer // haer // die ick wel sou vinghen // ras  
 Zy is noch eerbaer // maer // mocht ic by haer singen // ras  
 Bitter als brijn // fijn // ten baet gheen claghen // siet  
 Als Picamus en Tisbe ick my sou draghen // siet  
 Niet als Teseus die Adricana was ontgaen,  
 Helena mocht haer wel van Paris vertsaghen // siet  
 Want hy vloot van haer hoe wel sy hem was onderdaen  
 Maer als Leander wilt my toch verslaen  
 Die sijn leuen liet soo my die Pocet doet vermaen  
 Meleager heeft seer groote liefde ghecreghen  
 Door dat hy sach die schoone Atalanta seer saen  
 Och lief sonder v en wast niet te deghen.

Iuno en Pallas snel // fel // en die gossinnen // al  
 Ghy maect my rebel // wel // om een die ick minnen // al  
 Want ic verlang naer // haer // die in mijn hert staet // nu  
 Och mijn gequel // fel // dat my noch meer verspinnen // al  
 Want v beuel // spel // ick van binnen // al  
 Och gheen caer // daer // dan ghy dit aenvaet // nu  
 O Minerus tot v coem ick om raet // nu  
 Och wilt my tot die alderliefste raet gheuen  
 Die ick daghelijcx sie op die straet // nu  
 Als ick haer sie soo doet sy al mijn hert beuen,  
 Och mocht ick met Dedalus vliegghen beneuen  
 Ick en sou met Icarum niet willen sneuen  
 Daer sy met my ghelijck ick met haer ben bewegghen,  
 Want door mijn ghesicht heb ickse int hert geschreuen  
 Och lief sonder v en wast niet te deghen.



O Troylus bloet // goet // sult ghy lijden // noch  
 Baltasar soet // vroet // groote liefd ginc bestrijden // noch  
 Om Pallas alles alleyn // reyn // droech hy liefd' bouen maten // siet  
 O Hercules met spoet // boet // van onse zijden // noch  
 Het monster nu moet // doet // en wilt ons bevryden // noch  
 So mogen wy certeyn // cleyn // groote liefd' aenvaren // siet  
 Want door mijn gesicht en can ick haer verlaten // siet  
 Dus en can ick haer niet langher deruen  
 Want mijn hert wil my scheuren ten baet geen praten // siet  
 Sal ick lief van v noch gheen troost verweruen  
 Sal ick dan met Tantalus hongher en dorst steruen,  
 Och mijn lief moet ick liefde absent dreghen  
 Door mijn gesicht hoop ick nochtans troost te beeruen  
 Och lief sonder v en wast niet te deggen.

**Prince.**

Princen ic arm scholier // hier // die cleen van machten // ben  
 Want ick sonder gherier // fier // int wachten // ben  
 Na mijn lief certeyn // reyn // om te verhalen // oock  
 Och dat dier // schier // waer af ic groot van gedachten // ben  
 Ic die als een vrier // tier // die cleyn van crachten // ben  
 Ic mach wel beneen // treen // om niet te dwalen // oock  
 Want het ghesicht en mach niet falen // oock  
 Als ick haer sie soo crijch ick de liefde van binnen,  
 Als Hippomenes sal ick v betalen // oock  
 Want hy door zijn gesichte creech liefd' en groote minnen  
 En daer na ghinck hyse met loopen verwinnen  
 Loopende stercker als Herten oft hinnen  
 Hy en vreesden gheen doot noch langhe weggen  
 Door dat hyse sach sitten, setten op haer zijn sinnen  
 Och lief sonder v en wast niet te deggen.

*Daet sonder Roem.*

***Refereyn***

O Godt almachtich, weert om te prijsen  
 Waer wt die liefde van aenden beghinnen  
 Haeren oorspronck heeft, als ons onderwijsen  
 Propheten, Apostelen, wilt dit bekinnen,  
 Want hy heeft zijn Soon ghesonden wt minnen  
 Wt eeuwiger liefde hier op der aerden  
 Voor ons arme sondaren wilt dit versinnen  
 Om dat wy zijn liefde souden aenvaerden  
 Tot onser Salicheyt, zijn ghenade en spaerden  
 Wy noyt wt liefden heeft lief zijn liefde ghethoont  
 Door zijn ialoerse liefde als de vermaerden  
 Heeft hy d'aerde vervult. en zijn lief verschoont  
 Voor zijn bruyt lieffelijck int hoochste ghecroont  
 Dus solueer ick dit met sinnen voordachtich  
 Wt Godt, heeft die liefde haren oorspronck waerachtich.

Wt zijns vaders rijck is hy neder ghedaelt  
 En heeft het steruen wt vierigher liefden groot  
 Aengeveert, seer lieffelijck ten heeft niet gefaelt  
 Om volcomen troost te gheuen zijn lief minioot  
 En heeft haer bevrijt van die eeuwige doot  
 Daeromme sal lief, met liefde wonen te gader  
 En hy sal haer ontfanghen in zijn armen bloot  
 Wt grooter liefde by zijnen Hemelsche Vader  
 Die oorspronck van liefde is, ons druc ontlader,  
 En t'cleet der suyeringe sal hy zijn lief omhanghen  
 Door zijn bloet root als een leuende ader  
 Sal hy wt liefde zijn lief ontfanghen  
 Haer cussende met zijn bloet-verwighe wanghen  
 Segghende, Coemt lief weest mijn rijck deelachtich  
 Wt Godt, heeft die liefde haren oorspronck waerachtich.

Christus spreekt wilt altesamen van my leeren  
 Want ick ben sachtmoedich ende goedertieren  
 En wilt die liefde niet van v weeren  
 Hy is d'oorpronck van haer met goede manieren  
 Zijn amoreuselijck wesen cant al vercierien  
 Daerom wilt altijd by dees liefde blijuen,  
 Op dat v die boosen niet en schoffieren  
 Door haer quaet voornemen met vals bedrijuen  
 Soo sal die oorspronck der liefde aen v beclijuen  
 Met een eeuwighe vreucht, die niet en sal vergaen  
 Die liefde sal zijn bruyt, dan van als gerijuen  
 Op dat zy in zijnder liefde vast blijft staen  
 Door zijn liefde worden sliefs traenen af ghedaen  
 Ende niet meer en salse wesen clachtich  
 Wt Godt heeft die liefde haren oorspronck waerachtich.

**Prince.**

Desen Princelijcken Minnaer, oorspronck der liefde  
 Hy heeft, om zijn bruyt den doot verslonden  
 Des vyants macht benomen, dat hem zeer griede  
 Daer door zijn lief verlost, ende die banden ontbonden  
 Door zijn vierighe amoreusheyt ist beuonden  
 Dat hy groote liefde zijn bruyt heeft bewesen  
 En ter doot toe bemint, naer schrifs vermonden,  
 Hy is een Ialoers Liefhebber wtghelesen  
 Ia die rechte Oorspronck vande liefde ghepresen  
 Want sonder hem is niet, tot gheender tijt  
 Dus betoont hem weder liefde mits desen  
 Op dat hy door zijn liefde ons ghebenedijt  
 Hy isset beghin en eynde sonder respijt  
 En voor zijn groote liefde is hijt al machtich  
 Wt Godt heeft die liefde haren oorspronck waerachtich.

*Aensiet de Ionckheyt.*

*Schiedam.*

**Refereyn**

Aenmerct al ghy amoureuse met cloecken verstant  
 Waer der liefden brant  
 Inden minnaer toch zijn oorspronck wt heeft,  
 Die Cupido gheeft  
 Noyt ick by Poëten van der minnen bant  
 Gheschreven en vant,  
 Eerst en was sien oft hooren daer liefde door aencleeft  
 Hem die in minne leeft.  
 Dees twee (seg ick) sijn oorspronc, want Appollo dreeft  
 Sien van Daphne, gheheel in Venus net,  
 Hoe menich minnaer noch door sien in minne sneeft  
 Iupiter door thooren werde in minne verhet  
 Dan wat ist datmen veel op sulcke minne let,  
 Christenen behooren op Gods liefde te bouwen  
 Die Godt in zijn woort ons heeft voorgheset  
 Waer van om in Gods liefde te betrouwen,  
 Aensien hooren: soud'ic voor den oorspronc houwen.

Gy Babel ist sien en hooren verboden  
 Om wt te roden  
 Dat eeuwige ontelick Godes woort,  
 En Christus sey dat hoort:  
 Maer Babel heeftse ghebraden en ghesoden  
 Die daer Godt der Goden  
 Int woort beminden doende Gods rappoort,  
 Soo Gods kindren vermoort  
 Christus segt doorsiet die schrift zy tuycht v voort  
 Op my, welcke dat Babel verbiet te lesen,  
 Sy wil datmen die rechte liefde Gods versmoort  
 En selfs met haer gheboden zijn ghespresen,  
 Want zy weet wt sien en hooren is gheresen  
 Liefde int herte, dus doet Babel aenschouwen  
 Haren broot godt, en preken veel wonders van desen  
 Hoe zy dees duuelsche liefde int herte brouwen  
 Aensien en hooren soud'ic voor den oorspronc houwen.

Vremde goden liefde heeft Israël becomen  
 En oorspronck ghenomen  
 Wt aensien en hooren, want zy ghelijck spraken  
 Wilt ons een Godt maken  
 Die wy sien, insghelijcx noch Bels papen dromen  
 Sonder dat zy schromen  
 Heliass comste die haer sal ghenaken  
 En dapper raken  
 Dan ick prijs v broeders, wilt die schrift recht smaken  
 Siet haer door, sy sal v in liefde verwecken  
 Tot Godt almachtich, en leeren te waken  
 Op des bruydegoms comst, ooc v herte trecken  
 Tot liefde ws naesten, dus wilt tegemoet doch strecken  
 Om haer wel te hooren, tsal v niet benouwen  
 Maer in liefde ontsteken, en v ontdecken  
 Waer Gods liefde wt spruyt, sonder verflouwen  
 Aensien en hooren, soud'ic voor den oorspronc houwen.

Princersse Schriftuere die v oyt recht doorsagen  
 Hadden welbehaghen  
 In v, want haer salicheyt dat sy vonden  
 Te zijn ghebonden  
 Aen Christo, ghy segt haer oock hoe sy eerst laghen  
 In die doot verslaghen,  
 En hoe Christus door liefden heeft onse sonden  
 In zijn doot verslonden,  
 Dus door v wort die liefde Christi ontwonden  
 Die den minnaer hoorende, liefde doet rijsen  
 V schoonheyt schriftuere, is niet om doorgronden  
 Doot ende leuen cont ghy den minnaer wijsen  
 Zijn hongherighe liefde die cont ghy spijsen  
 Heeft hy ghevallen, tis hem stracx berouwen  
 Als hy v maer hoort, moet Gods weldaden prijsen  
 Dus van Gods liefde, Schriftuer eel vrou der vrouwen  
 Aensien en hooren, soud'ic voor den oorspronc houwen.

*Aensiet die Ionckheyt.*

*Schiedam.*

**Refereyn**

Als ick noch niet en wiste wat liefde was  
 En hy goet gheselschap mede quam te pas,  
 Daer by een waren songelingen en ionckfrouwen,  
 Niet wetende hoemen der minnen blomen las  
 Zijnde als een kint, onnoosel in dat cas  
 Werde van Cupido gheschoten seer ras  
 Mits ic een schoone bloeme eens began t'aenschouwen  
 Mijn verwe verschoot, ick en can my niet onthouwen  
 Dan stelde my by haer, doch t'herte docht my beuen  
 En was nochtans verheucht, brandende met benouwen  
 Naer dat zy een liet constich hadde op gheheuen,  
 Daer zy der Goden minne in heeft ghedreuen  
 Mijn lijf ende ziel ghaf ick haer strax te voren  
 Dus quam d'oorspronck der liefde die my is gebleuen  
 Inwendich int herte door aensien en hooren.

Als mijn hert aensach haer clare bruyn ooghen  
 Ben inden Gheest der liefden, op ghetogen  
 Dat ick selfs niet en wist wat dat ick dede,  
 Ick sochte liefde te toonen wel naer mijn vermoghen  
 Haer mondeken root met knien gheboghen  
 Had ick wel ghecust dan sorchde bedroghen  
 Te zijn, en soo my te maecken onvrede  
 Haeren voys lustich clanck aldaer ter stede  
 Orpheus snaerspel isser niet by te ghelijcken  
 Hier quam ick inden strick der liefden mede  
 En derf naulijcx noch mijn herte laten blijcken  
 Och schoon lief ick en sal v niet beswijcken  
 Ghy blijft mijn alderliefste lief wtuercoren  
 V liefde is te gheweldich comen strijcken  
 Inwendich int herte, door aensien en hooren.

Als ick mach hooren v lustich diuiseren  
 Hoe ghy altoos v seluen wilt verneren  
 Die een Coninghinne te wesen zijn waerdich  
 Voor hooch en leech kundy paroreren  
 Wie soude sulc een persoon niet begheren  
 Lijf bloet en goet, wil ick om v uerteren  
 Die int gaen en staen zijt fris en aerdich  
 Wat ghy doet het gaet van uwer handen vaerdich  
 Met v teere leden, ghy edele diamant  
 Wat d'amoureuse toestaet zijt ghy in experdich  
 Sedich van wesen, ende loyael abundant  
 Ick segghe men Helena noyt soo begaeft en vant  
 Lief laet mijn arbeyt doch niet zijn verloren  
 Oorspronck der liefde was van desen brant  
 Inwendich int Herte door aensien en hooren.

***Prince.***

Princesse Venus ontsteect oock in haer  
 tvier der minnen maeckt den brant openbaer  
 Bouen alle huysen en verciert mijn wesen,  
 Om ons te versamen in liefde te gaer  
 Want liefde alleen te draghen valt te swaer,  
 Dus Goddinne verciert my met schoonheyt clær  
 En Pallas regeert mijn tonghe, want door desen  
 Sal ick wel vercrijghen mijns herten wtghelesen  
 Vercoren lief, en in haer herte comen  
 Venus weest my behulpsaem soo wert ick ghenesen  
 Maeckt my behaghelijck by die blom der blomen  
 Want de liefde wert hy den minnaer aenghenomen  
 Als ieghelijck minnaer wel mach bespooren,  
 Die hem hier van liefde iet wil beromen  
 Inwendich int herte door aensien en hooren.

*Aensiet die Ionckheyt.*

*Schiedam.*

**Refereyn**

Als ick overdenck waer eerst liefd' wt gesproten, is  
 Tot een die amoureuse alder schoonste blome  
 Van wien in menich hert die schicht gheschoten, is  
 Haer eens hebbende gehoort, dus op dat ic come  
 Tot oordeel, en menich help wten drome  
 Segghe het os wt hooren van spraeck ende sanck  
 Waer in ick dees amoureuse heerlijkck nome  
 En haer aenschouwen oock menich tot liefde dwanck  
 Die nijders haer by wesen verboden een tijt lanck  
 Om haer schoonheyt, ick meyn dedel schriftuere  
 Die nu wel doorsien mach zijn (seg ick) Godt danck  
 En ghekoort van elck minnaer claer en puere  
 Haer minne is soet, al schijnse menich suere  
 Dus is dat alst natuer hier oock elck minnaer gheeft  
 Wt aensien en hooren liefde haren oorspronck heeft.

Sulcx is wel met elck minnaer te bewijsen  
 Dat zijns liefs ghesichte hem liefde doet draghen  
 En tghehoor oock die liefde brandich doet rijsen  
 Soo dat hy om haer by zijn, zijn leuen sou waghén  
 Desgelijcx een minnaer, mach schriftuer hem behagen  
 Sal in Godts vierighe liefde werden beuonden,  
 Wie hoorde haer stemmes ghelijck oyt zijn daghen  
 Daer den minnaer van haer mede wert ghebonden  
 Sy is wt den Hemel hier neder ghesonden  
 Als een fonteyne vloeyt wt haer alle melodye  
 Haer schoonheyt en duecht is niet om doorgronden  
 Mijn herte wert brandende als ick haer doorsye  
 Oft als ick haer hoore, in mijnen gheest ick verblye  
 Dus moet elck kennen die hier in minne leeft  
 Wt aensien en hooren liefde haren oorspronck heeft.



Mach de schriftuere schoon cieraet aenschouwen  
 En haer edel ghesichte doorsien met uwen oghen  
 Hy sal die schoone totter doot toe betrouwen  
 Ende werden tot waerachtighe liefde ghetoghen  
 Wt haer wert honich ende melck ghesoghen  
 Sy zijn victorieus die met haer strijden  
 Haer liefde noyt minnaer bedroghen  
 Wie soude haer absentie dan moghen lyden,  
 Die den crancken door haer stem hier can bevrijden  
 Van zijn siecte, zijnde voor ieghelijck loyael:  
 Alle twist en moeyten stellende ter zijden  
 Waerom ick haer aenschouwen en hooren verhael  
 Daer de liefde int herte wt rijst principael,  
 Dus inden minnaer die met trou zijn lief aencleeft  
 Wt aensien en hooren liefde haren oorspronck heeft.

***Prince.***

Princesse schriftuere waerdich om sien en hooren  
 In v mach die liefde Godts voor elck blijcken  
 Die hy heeft ghetoont voor zijn wtuercoren  
 Daer gheene liefde by en is te ghelijcken,  
 Alle aertsche liefde moet voor dees liefde wijcken  
 Die in zijn Soon heeft getoont den almoghenden Heer  
 Dus als ick v doorsie comt die liefde strijcken  
 In my tot mijnen Godt, en wert soo langs soo meer  
 Oock tot mijnen naesten, waerom ick my tot v keer  
 Om te hooren uwen sanck die mijn salicheyt verclaert  
 Te staen in mijnen Godt, hem zy lof, prijs, en, eer  
 En v aensien in my Godts kennisse openbaert  
 Verweckt recht liefde van Godlijcker aert  
 Dus blijktt dat mijn oordeel aen v niet en sneeft  
 Wt aensien en hooren liefde haren oorspronck heeft.

*Aensiet liefd'.*

*Vlaardingen.*

**Refereyn int Amoureux.**

Daer zijn veel middelen den mensche gheiont,  
 Daer door dat de liefde, wat oorsproncks heeft  
 D'een aende eerbaerheit die *van hem* wort vermout  
 D'ander, om dat hy in veel deuchden sweeft  
 De derde, om de schoonheyt die hem aencleeft  
 De vierde, door zijn lustich singhen met gratie:  
 De vijfde, door eloquentie, die hem niet begheeft,  
 De seste, door een moedighe dominatie,  
 De seuenste, door eenighe insinuatie,  
 De achtste, door veel prijzen ende louen  
 De neghende, door minnelijcke conuersatie  
 De thiende, om datmer veel siet verschouen,  
 Dan ick segghe (op de vraege als bouen)  
 Op dat my gheen rechte solutij soud' ontbreken:  
 Doort ghesichte, met reyn begeerte ontsteken.

Dat een reijn ghesichte daer van den oorspronck // is  
 Can Iulij Cesar, en Cleopatra, betoonen  
 Crusa, en Eneander, namen desen wronck // wis  
 Iason, en Medea, sullen dit oock verschoonen,  
 Ene is, conde Dido, daer door oock hoonen,  
 Paris, en Helena, zijn dus int spel gheraeckt  
 Vlisses, moeste daerom Penelope, croonen  
 Phillis, daerom op Demophon seer craeckt  
 Agamemnon, daerom ontschaeckt  
 Hercules, liet hem van Omphaie verdoouen  
 Phedra, Hipelitus, daer door ghenaeckt  
 En Ariadne, moest Thesus, daer by gheloouen  
 Accontius, conde Cidippe soo beroouen  
 Waer door ick blijue by mijn eerste treken  
 Doort ghesichte, met reyn begheerte ontsteken.

Wilt ghy de Poëten hier in beclaeghen  
 Als oft sy de waerheyt niet hadden gheschreuen,  
 Laet ons hooren wat alle minnaers ghewaeghen  
 En wat getuychenis dat zy sullen gheuen,  
 Ia oordeelt vry, alle die daer noch leuen  
 Ghemint hebbende, en die noch beminnen  
 Is door tghesichte den oorspronck niet ghedreuen  
 Vande Liefde, die ghy draecht int herte binnen  
 Want al hadde v Lief haer volcomen vijf sinnen  
 Oft Venus schoonheyt, ende Pallas verstant,  
 Ia alle volmaechtheden diemen can ghewinnen  
 Tis v onnut, siet ghy niet dees gauen vaillant  
 Waer door thert tot haer crijcht begheerte playsant,  
 Dies ick noch segghe, al soudijt wreken  
 Door tgesichte, met reyn begheerte ontsteken.

***Prince.***

Prince tghesicht is oorspronck van desen,  
 Tghesichte is oorspronck van elck minnaer  
 Door tghesichte, canmen minnebrieuen lesen  
 En die secretelijck beantwoorden voorwaer  
 Door tghesichte *belouen* sy malcander eenpaer  
 Vreucht *ende* vrientschappe, in alle contreyen  
 Tghesichte seyt oock dickwils: Ia seer claer  
 Dat de tonghe niet en derf bescheyen,  
 Ia door tghesichte haer alle minnaers bereyen  
 Om stoutelijck haer liefkens aen te ranssen,  
 Door tghesichte connen sy wtwendich schreyen  
 Om alsoo tghelooue daer op te doen danssen  
 Tghesichte moet ghebruycken groot en cleene hansen  
 Waerom soud' ick dan niet deruen spreken  
 Door tghesichte, met reyn begheerte ontsteken.

*Corrigez sans reproche,  
 Briele.*

**Refereyn**

Den oorspronc der liefden comt wt Godt verheuen  
 Als hy ons in sijn gheboden heeft gheheten  
 Seggende, ghy sult Godt bouen al aenleuen  
 V naesten als v seluen suldy niet vergheten  
 Lief te hebben, dit laet hy v weten,  
 Want alsoo lief Godt die werelt ghehat heeft  
 Als Ioannes ons int derde gaet wtmeten  
 Dat hy ons sijn eenighe Soon gaf die eewich leeft  
 En noch een ander ghebot Christus ons gheeft  
 Dat wy malcander sullen lief hebben en houwen  
 Ioannes in sijn derthienste beschreeft  
 Soo ick v lief ghehadt heb is mijn ontfouwen  
 Oock in sijn veerthiende gaet hy veel herknouwen  
 Dus heeft die liefde sijn oorspronck van desen  
 Wt Gods wil en woort soomen mach lesen.

Noch schrijft Ioannes in sijn vijfthiende claerlijck  
 Soo ghy mijn gheboden hout soo suldy blijuen  
 In mijn liefde spreect Christus openbaerlijck  
 Ende int sesthiende gaet hy oock schrijuen  
 Die Vader heeft v selfs lief, is sijn bedrijuen  
 Om dat ghy my lief ghehadt hebt seyt Christus puere  
 Tot den Corinthen int tweede hoort mijn motijuen  
 Seyt Paulus om dat ghy sonder ghetruere  
 Mijn liefde sout weten, soo hy in de schriftuere  
 Daer, en op veel plaetsen gaet verhalen,  
 Als oock tot den Ephesen int eerste duere  
 Ende int tweede, en derde gaet principalen  
 Daer is van wtnemende liefde sijn qualen  
 Dus can den oorspronck der liefde zijn bewesen  
 Wt Gods wil en woort soomen mach lesen.

Wt Gods woort machmen d'oprechte liefde bewijsen  
 Die Godt tot ons, en wy tot malcander draghen  
 Dus sietmen den oorspronck der liefde rijzen  
 Wt Gods wil en woort, hoort mijn ghewaghen  
 Tot den Philippen en int tweede gaet vraghen  
 Na die vertroostinghe der liefden vrymoedich  
 Hy schrijft oock tot die Colossensen by vlaghen  
 Dat sy sullen wesen lieflijck en goedich,  
 Voort tot die broederlijcke liefde zijt spoedich  
 Soo wert tot die Tessalonicensen gheschreuen  
 Van Paulus, want hy is inde liefde gloedich  
 In ontstekinghe der liefden beneuen  
 Als den Hebreen int thiende wert ghegheuen  
 Dus heeft die liefde zijn oorspronck ghepresen  
 Wt Gods wil en woort, soomen mach lesen.

***Prince.***

Den oorspronck der liefde Princelijcke broeder  
 Sietmen Godt in zijnen wil en woort ghebieden  
 Ghelijck Petrus schrijft, als een oprecht behoeder  
 In zijn ghemeyn sent-brieuen aen alle lieden  
 Men vint veel sotte liefde, twaer beter te vlieden  
 Alsulcken liefden vrienden eersame,  
 Dat wy malcander tot oprechte liefde rieden  
 Als ons alle schriften thoonen bequame,  
 Men leest oock hoe Godt was aenghename  
 Die menschen als hy die werelt eerst had gheschapen  
 Hy onderwerpt die menschen altesame  
 Al wat aessem hadde oft mont om gapen,  
 Waer wt men sach die eerste liefde betrapen  
 Daer was den oorspronck der liefde verresen  
 Dus comt hy wt Gods wil en woort soomen mach lesen

*Tot vreucht gheresen.*

*Swartswale.*

**Refereyn**

Vvy Rethorices geesten die conste beminnen,  
 Minst metten meesten zijn wy bereyt  
 Omn op uwe vraghen antwoord te beghinnen  
 Versinnen wilt doch wat v wert geseyt,  
 Waer wt de liefde haren oorspronck heyt  
 Is wt het ghesichte ick segt v voorwaer,  
 Alst wel bleeck aen Hipsiphille twert v wtgeleyt  
 Doen sy Iason quam int openbaer  
 Tghesichte deet vier branden in heur seer claer  
 Dat de liefde in haer soo seer was ontsteken  
 Deur mistroosticheyt sy van tgeberchte viel seer swaer  
 Ende heeft haer inde Zee ghestreken  
 Medea heeft Iason soo seer aenghekeken  
 Soo dat haer herte van liefde heeft ghebeeft  
 Deur tghesichte, de liefde haren oorspronck heeft.

Ombartus een Coninck rijck ende machtich  
 Heeft hy deur tghesichte niet sijn liefde gheleyt  
 Om een ionghe dochter, ick segt v crachtich  
 Die simpel van gheboorte was, twert v gheseyt  
 Priamus deurt ghesichte, was hy niet bereyt  
 Om zy zeluen therte door gaen te keruen,  
 Thisbe die ouer schoone in alle schoonheit,  
 Wilde zy niet deur tghesichte in liefde steruen,  
 Mars moeste hy oock niet in smaetheyt sweruen  
 Doen hem Vulcanus in sijn yserwerck met liste sloot  
 Om dat hy die schoone Venus niet wilde deruen  
 Die hem soo Amoureuuselijck haer mondeken boot  
 Mercurio die saecke oock niet en verdroot  
 Hy hadde oock nobel willen spelen met Venus beleeft  
 Deur tghesichte, de liefde haren oorspronck heeft.

Duert ghesichte die Oude Susanna begeerden  
 Ende waren in haer liefde barnende groot  
 D'exploot des viers niet en Censseerde,  
 Maer brande in Daidt duer liefde minioot  
 Als sy die schoone Bersabea sach naeckt ende bloot  
 Moest duert ghesichte Samson in droefheyt sweruen  
 Soo dat hy rustede in Dalidas schoot  
 Die hem seer ras zijn haer af ghinck keruen  
 Salomon wilde ooc geen wt lantsche vrouwen deruen,  
 Daerom ghinck hy die wech des Heeren besijden  
 Phutyphaers huysvrouwe wilde van liefde steruen  
 Om dat sy met Ioseph niet mochte verblijden  
 Duert ghesichte van Iudith quam oock in lijden  
 Holofenis den Prince die heeft ghesneeft  
 Duer tghesichte die liefde haren oorspronck heeft.

Princelijcke Prince duert ghesichte puere  
 Schoonder figure en wasser noyt verschoont,  
 Als die schoone Breseda schoon van natuere  
 Binnen die Troysche mueren was zy ghecroont  
 Troylus heeft zijn liefde aen haer ghetoont  
 In den tempel van Dyana hy haer dick aenschouden  
 Hoe wel de liefde hem niet werde gheloont  
 Vrolijcken hy daer nochtans op bouden  
 Arphaxadt den Coninck in liefde woude  
 Deurt ghesichte van Ester was hy beuanghen  
 In reynder liefde twelck hem niet en roude  
 Iacop deurt ghesichte van Raechel verlanghen  
 Die liefde ghinck hem soo seer aenhanghen  
 Veerthien iaren Venus webbe hy heeft gheweest  
 Duer tghesichte die liefde haren oorspronck heeft.

*T'spruyt wt Ionckheyt.*

*Nieuwenhoven.*

**Hier volgen de Refereynen Vanden Reghel. *Met minnen versaemt.***

Hoe is die werelt hedens-daechs verkeert  
 Elck een begheert zijn seluen te behaghen,  
 Deen in danders fouten nv glorieert  
 Niemandt zoo geleert, die dander wil verdragen,  
 Wie kent toch hem seluen, ick moetet vraghen  
 Men mach segghen, niemant, met ware reden,  
 Daerom arghert die werelt van daghe tot daghen  
 Twelck is te beclaghen in dorpen en Steden  
 Waer zijn die arme van gheeste, (al ouerleden)  
 Die haer seluen verneren, en voor die minste houwen,  
 Deen soude voor d'ander niet een voet vertreden  
 Want elck wil de meeste zijn int aenschouwen  
 Daerom stel ick hier een reghel, om op te bouwen  
 V eyghen betrouwen, wilt ind' aerde deluen  
 Lijdt deen des anders fouten, soo kent ghy v seluen.

Conde deen des anders fouten lijden  
 En verdragen, ia mijden, eyghen goetduncken quaet  
 Hoe soude hy hem seluen kennen, t' allen tijden  
 En sijn seluen bevrijden, van verborghen haet  
 Denckende ick leef oock, in een soodanighen staet  
 Sondich, onvolmaect Dauids beschrijven  
 Maer als ons naesten struyckelt, wy brengen op straet  
 En onder malcander den spot daer me drijuen  
 Dan kennen wy ons seluen niet arm snoode katijuen  
 Want wy beroemelijck op ons goede wercken staen  
 Laten kennisse van ons seluen achter weghe blijuen  
 Wijsende met den Phariseens op den Publicaen  
 Desen Reghel te onderhouden wort v gheraen  
 Op dat ghy sonde op sonde niet stelt aen scheluen  
 Lijdt deen des anders fouten soo kent ghy v seluen.



Hadden de Schriben en Phariseen haer selfs gekent  
 Maer sy waren verblent van sinnen ghemeen  
 Al zy Christum die ouer-spielster brochten present  
 Willende t' mandement van Moyses niet ouertreen  
 Hier kenden zy haer seluen niet alst claerlijck scheen  
 Want zy wilden niet lyen des vroukens ghebreken  
 Die wt v sonder sonde is, werpt den eersten steen  
 Dit hoordemen Christum tot die gheveynsde spreken  
 Doen zijn zy al stil swijghende van hem gheweken  
 Want kennisse van haer seluen quam haer te voeren  
 Dies zy leden t' vroukens fout sonder dat te wreken  
 Want zy kenden haer seluen vol sonden ghebooren  
 Dus mochten zy met recht na mijn reghel hooren  
 Dees Schriben en Phariseen met haer thien oft eluen  
 Lijt deen des anders fouten, soo kent ghy v seluen.

***Prince.***

Conden Princen en Heeren lijden en verdreghen  
 Malcander ter deggen als zy abuseren  
 En kenden elck hem seluen op straten en weggen  
 Zy en waren niet gheneghen, tot discorderen  
 Maer elck wil hedensdaecx datmen hem sal vereren  
 Bouen dander, hoe wel zy minder zijn van macht  
 Dus kent niemant hem seluen na mijn solueren  
 En deen op dander zijn fouten slaet acht  
 Dus zijn die menschen nv meest van alsulcken geslacht  
 Daer ons in Matheo af wert beschreuen  
 Sy sien wel een splinter, in haers broeders ooggh onsacht  
 Maer om den balck in haer selfs ooggh zy niet en geuen  
 Dus seg ick tot de sulcke die noch soo leuen  
*Castyt sonder verwijt* laet deucht v ouerweluen  
 Lijt deen des anders fouten, soo kent ghy v seluen.

*Liefd' baert vrede.*

*Per Yselueer.*

***Met minnen versaemt. Refereyn.***

Och hoe is die werelt in roeren // nv  
 Door valscheyt die haer laet veruoeren // nv  
 Van valsche leeraers die daer comen // by  
 En zy gaen op de Christenen loeren // nv  
 Om te sien oft zy niet en misboeren // nv  
 Om dat zy haer soudē straffen en doen schroemen // vry  
 En alsoo comen zy v met blau bloemen // by  
 Om daer al met de Christenen te ghecken  
 Ende comen alsoo met haer dromen // by  
 Om meer andere met haer te verwecken  
 En schijnt dat zy haer met groot lijden bestrecken  
 En comen alsoo in diuersche plecken  
 Ende zy zijn meer als met hen eluen  
 Maer daer quam een spraeck in dese vleckē  
 Lijdt deen des anders fouten, soo kent ghy v seluen.

Hoe wel sy dit hoorden en achten // niet  
 En deden noch euen wel haer clachten // siet  
 Om die Christenen te behalen // al  
 En zy quamen met al haer crachten // siet  
 Om de Christenen te berispen en te verachten // siet  
 En meynden de Christenen te doen dwalen // al  
 En seyden wy lijen, maer sy falen // al  
 En spraken wy hebben Christum besloten,  
 Hoe soumen haer ghenesen van dees qualen // al  
 Want Godt is met ons int vloten,  
 Ia in vleesch ende bloet onuerdroten  
 Door ons lijen zijn wy vol schrifs ghegoten  
 En wy connen ons oock met Christum ouerweluen  
 Maer daer quam een segghen, en ontbont sijn loten  
 Lijdt deen des anders fouten, soo kent ghy v seluen.

Wie een and' wil straffen, moet onstraffic wesen // ooc  
 Op dat hy Godt den Heer mach vresen // oock  
 Den welcken in gheen tempel en woont // claer  
 Die met handen wort ghemaect by desen // oock  
 Daer en wil Godt den Heer niet in wesen // oock  
 Maer woont by zijnen Vad' die hem heeft gecroont // claer  
 En hy laet geen goede wercken ongheloont // daer  
 Want hy heeft voor ons fouten gheleden  
 En heeft ons sonden daer me verschoont // claer  
 Ende heeft voor ons alsoo ghestreden  
 Maer wy menschen, en zijn noch niet te vreden  
 Daer coemter veel seggen dat zy Gods woort verbreden  
 Maer zy mochten wel segghen dat zijt bedeluen  
 Want ick spreek haer nu aen met soeter seden  
 Lijdt deen des ander fouten soo kent ghy v seluen.

**Prince.**

Princelijcke leeraers, v in een goet accoord // hout  
 En als Abraham, dus v nv rechte voort // hout  
 Als Noë, Iob, Salomon, Dauidt obedient // was  
 Niet als Lucifer, Pharo, Saul, hem discoort // hout  
 En Achab, Iesabel, d'onnoosel bloet versmoort // hout  
 Want den vyant altijd listicheyt ontrent // was  
 Maer Lot, Susanna, daniel, waer God present // was  
 En Iacop, Tobias, haer ghinghen tot deuchden vlyen  
 En Ioseph, die int luen oock excellent // was  
 Sydrach, Mysach, Abdenago, waren int stryden  
 Doen zy den Bel geen reuerencie wouden byen,  
 Maer bleuen stantvastich met hen dryen  
 Maer Iudas, Amon, zijn niet als stinckende scheluen  
 Waer op ick nv seg sonder vermijen  
 Lijdt deen des ander fouten, soo kent ghy v seluen.

*Daet sonder Roem.*

***Met minnen versaemt. Refereyn.***

Alle menschen die onder Godts ghebot // zijn  
 En staen op haer seluen hier wel op let  
 En dragen haren roem datse goet voor Godt // zijn  
 En weten die schriftuer en blijuen besmet  
 Sy zijn hooch gheleert en weten wel bet  
 En vermeten haer te zijn leyders der blinden  
 En lichters der ghenen die in duysternis zijn verplet  
 En leeraers der ongheleerden oft zy Godt beminden  
 En haer eyghen fouten kunnen zy niet vinden  
 Sy leeren een ander en haer seluen niet  
 En segghen wy zijnder in ghestelt als wel ghesinden  
 Van Godt ghelijck die Apostelen waren siet  
 En haer eyghen siel brenghe zy int verdriet  
 Hoe menich isser tgaet wte thien oft eluen  
 Lijt deen des anders fouten, soo kent ghy v seluen.

Wie zijn seluen onschuldich voor Godt wil kinnen  
 Die moet lijden en verdraghen wat hem wert gedaen  
 Sijn vyant soo wel als zijn broeder beminnen  
 En gheen ouerspel doen noch niemant doot slaen  
 Noch niemant oordeelen soo ghy vint beschreuen staen  
 Want wie een ander oordeelt seyt Paulus clær  
 Die verdoemt zijn seluen na schrifs vermaen  
 Want niemant comt het oordeel dan den hemelschen vaer  
 Dus bemint v euen naesten oft v seluen waer  
 Soo en suldy in gheen sonden versmooren  
 Deylt den armen van t'gheen dat ghy hebt eenpaer  
 Al weet ghy datse v haten van te vooren  
 Acht daer niet op wilter v mijt aen stooren  
 Blijft vast in Godts wet mijt der sonden scheluen  
 Lijt deen des anders fouten soo kent ghy v seluen.

Niemand leyt hem seluen hoe hy is gheleert  
 Daer is niemant rechtuerdich soo ghy vint beschreuen  
 Die Godt den Heer recht bemint, acht ende eert  
 Met het gheloof en die wercken daer beneuen  
 Want wie God acht, en die werelt heeft verdreuen  
 Die is rechtueerdich soo Paulus spreeckt  
 En kent Godt sonder te doen des wets verheuen  
 Soot door die wet en die Propheten wert ontdeckt  
 Want wie Godt kent die kent zijn seluen perfeckt  
 En hy leeft naden gheest sonder die werelt te moeyen  
 En acht op niemant soo zijt ghy beuleckt  
 Oft zy haer tot quaet oft tot goet doen spoeyen  
 Denckt op Godt alleen soo sal v toe vloeyen  
 Dat eeuwich leuen sult ghy dan bedeluen  
 Lijt deen des anders fouten, soo kent ghy v seluen.

***Prince.***

Ongoddelijcke menschen die haer veel vermeten  
 Ghelijck monnicken en papen die hier teghen vechten,  
 En noch meer ander die den wech wel weten  
 En dolen al willens, ghelijck die slechten  
 En zy willen een ander van zijn misdaet berechten  
 En selfs soo en zijnse voor Godt niet vry  
 Dese zijn siel-sorghers, ghenaemt Godts knechten  
 En kennen haer seluen noch veel minder dan wy  
 Sy en doen niet dan ouerspel en hoerery  
 En volghen al dat babeloonsche beest  
 Sy kennen Godt niet, zy setten hem aen deen zy  
 Sy zijn voor zijn oordeel niet bevreest  
 Sy moghen niet lijn dat iemant leeft naden gheest  
 Dies sal haer sonde die siel ouer weluen  
 Lijt deen des anders fouten, soo kent ghy v seluen.

*Hope troost my.*  
*Per wael.*

**Refereyn**

VWie is daer die *hem seluen* mach rechtvaerdich noemen  
 Wie is oyt geweest inden raet des Heeren  
 Wie derf hier zijn euen naesten verdoemen  
 Wie cant volcoemen anders dan Christus leeren  
 Wie dan Godt gheest, sietmen den sondaer bekeeren  
 Wie is daer oft by hem mach worden ghemist  
 Wie can die wijsheyt inden mensch vermeerren  
 Wie sal de schrift maken te wesne zonder twist  
 Wie can die wijsheyt inden mensch vermeerren  
 Wie sal de schrift maken te wesen sonder twist  
 Wie leeft sonder foute segt my eens die ist  
 Wie staet oft hy en mach vallen terstont  
 Wie zijt ghy diet al wilt corrigeren met list  
 Wie sal verstaen eens anders herten gront,  
 Wie wast die inden tempel voor Godt ghenade vont  
 Laet Godt dienaren ten oogst vergaderen die scheluen  
 Lijt deen des anders fouten, soo kent ghy v seluen.

Wie ist die daer op doet ende weder sluyt  
 Wie ist die daer can die sonden vergheuen,  
 Wie leyt ter hellen ende wederom daer wt  
 Wie ist die den dooden verweckt int leuen  
 Wie zijt ghy die verwijt v broeders sneuen  
 Wie siet den balck niet in zijn eyghen ooch  
 Wie is blind ende wijst den wech onbedreuen  
 Wie stelt int rijcke selfs zijn plaetse hooch  
 Wie was hy die zijn broeders int rechte tooch  
 Wie zijnt diet al willen hier emenderen  
 Wie ist die laet regenen ende die zee maect drooch  
 Wie anders is rechtuaerdich dus wilt v verneren  
 Wie zijt ghy die van Godt geen genade moet begeren  
 Dus op dat v Godts gratie mach ouerweluen  
 Lijt deen des anders fouten, soo kent ghy v seluen.

Wie ghy zijt helpt v broeders lasten draghen  
 Wie teghen v sondicht, vergheeft zijn schult  
 Wie v slaet, en wreect gheensints die slaghen  
 Wie noodich heeft daer staet dat ghy deelen sult  
 Wie v ouerlast doet, lijt al met ghedult  
 Wie ghy zijt, denckt hoe ghy v seluen ontgaet  
 Wie Christum wil volghen alsulcx vervult  
 Wie zijn broeder siet vallen, hy come hem te baet  
 Wie ist die op zijn eyghen wijsheyt verlaet  
 Wie wil vergheuen zijn, en vergeeft selfs niet  
 Wie wint dat Hemelrijck door zijn eyghen daet  
 Wie tsy, doet v naesten als ghy wilt dat v gheschiet  
 Wie zijn sonden bekennt noyt zijn broeder verstiet  
 Aldus wilt naer den verborghen schat hier deluen  
 Lijt deen des anders fouten, soo kenty v seluen.

Wie sal den Prince in zijn rijcke croonen  
 Wie zijnse die hy sal noemen zijn wtuercoren  
 Wie sal hy al door zijn bloet als dan verschoonen  
 Wie anders dan alleen die weder gheboren  
 Wie zijnt dan zy die tvlees lusten versmooren  
 Wie van haer en wilt van zijn broeder niet lijden  
 Wie wast die dat schaep socht daer daer was verloren  
 Wie wilt Christum niet volgen en met hem verblijden  
 Wie is een Christen en wil niet lijtsamich strijden  
 Wie wilt hem seluen rechtuaerdich maken  
 Wie leeft sonder sonde t'eenighen tijden  
 Wie moet nz door Godts genade in Godts rijk geraken  
 Wie zijn broeder niet verdraecht sal Godts broot niet smaken  
 Dus Godt roept v tsy ten achten oft ten eluen  
 Lijt deen des anders fouten, soo kenty v seluen

*Aensiet die Ionckheyt.*

*Schiedam.*

**Refereyn**

Broeders t'ghebet dat Christus ons heeft geleert  
 Nemt ter herten en merct wat hy daer in betoont  
 Dat wy al sondaers zijn dus v sinnen keert  
 In liefde op elckandere, op dat Godt v verschoont  
 Spreect als Daudid, Heere niet naer mijn daden en loont  
 Maer naer v bermherticheyt wilt met my leuen  
 Tis quaet dat iemant op hem seluen stoont  
 Oft dat opini wert ter salicheyt ghedreuen  
 Denct den Phariseus die hem seluen verheuen  
 Heeft, voor Godt inden tempel, hoe hy is gheuaren  
 Die Ioden, en zijn alleen tvolck ghebleuen  
 Dat soud' v Ieremias brief wel openbaren  
 Weet dat die Magi van Oosten gheen Ioden waren  
 Godt can diuers volck met zijn gheest ouerweluen  
 Lijt deen des anderes fouten, soo kent ghy v seluen.

Wel te recht mach Paulus ons Heydenen raken  
 Seght dat wy opden boom der Ioden zijn gheplant  
 Maer Godt can ons af snijden wilt dit wel smaken  
 Andere op planten door zijn moghende hant  
 Verwijt het glorieus roemen op religie want  
 Godt spreeckt wie hem verheft die sal moeten dalen  
 Eenen vromen voorganck, is voor Godt vaillant,  
 Dan tis wt gheen roem van alsulcx te halen  
 Leeft recht van Naman soo suldy niet dwalen  
 Die van Heliseo was heerlijk ghenesen  
 Laet die wijngaerdenier die last om te betalen  
 Wt genade moecht ghy toch maer een dienaer wesen  
 Wat roert v wien hy hier heeft wtghelesen  
 En beroepen ten achten oft ten eluen  
 Lijt deen des anders fouten soo kent ghy v seluen.



Weet dat niemant hier en is volcomen  
 Dan Christus en die heeft veel Diuersche schapen  
 Hy draecht haer lasten dus wildy v romen  
 Sijn name, soo en wilt v hier in niet verslapen  
 Argert den minsten niet die Christum voor zijn wapen  
 Hier heeft, merckt op die Coninghinne van westen  
 Wat een blom suldy hoenich en gheen fenijn rapen  
 Siedy iemant falen schickt dat ten besten  
 Want om schult betalen, sou aen ieghelijck resten  
 Dus wilt Godt den Vader toch den oost beuelen  
 Hy is den eersten, en blijft oock den lesten  
 Niemants misdaet sal hy int oordeel helen  
 Aent oncruyts vernielen salt hem niet schelen  
 Laet zijn dienaren dan vergaren die scheluen  
 Lijt deen des anders fouten, soo kent ghy v seluen

***Prince.***

Den Prince sprack recht wie daer is sonder sonden  
 Tot den Schriftgeleerden hy werp den eersten steen  
 Maer waer is oyt mensch alsulcx beuonden  
 Die sonder Godts ghenaden mochte wesen reen  
 Tis ghenade om ghenade al voor groot en cleen  
 Dan tbuert dagelijcx noch dat den onnutten knecht  
 Willende als opper dienaer regieren alleen  
 Met zijn broeder gheweldelijck wil int recht  
 Die nochtans zijn schult bekent eenvoudich en slecht  
 Och broeders niet alsoo vergheeft elck anders schult  
 Weest broederlijck int ghemoet aen een ghehecht  
 Lijt elckander op dat ghy Godts wille veruult  
 Elck struyckelt haest dus elckander ghy lijden sult  
 Hoe wel ghy naer den verborghen schat wilt deluen  
 Lijt deen des anders fouten, soo kent ghy v seluen.

*Aensiet die Ionckheyt.*

*Schiedam.*

**Refereyn**

Laetstmael *quam* my voor alsoo vrende gedachten  
 Al op een plaetse daer ick doen vernachten  
 My docht daer regeerden *een* so wijsen heer vaillant  
 Tvolc *quam* by hem geloopen met grooter machten  
 Van alle natie en elck de zijn clachten  
 Hoe datse waren bedoruen in Nederlant  
 Elck socht aen hem troost en door zijn goet verstant  
 Hy haer terstont vraechde, wel wat is v begheren  
 Spreect vrijmoedich, laet my hooren als v te hant  
 Doen waren daer som, die wilde hem informeren  
 Des anders ghebreken, en wildent doceren,  
 Dat dese dwalen, al warensse met haer eluen  
 Die de Catholijcke religie resisteren  
 Maer den wijsen antwoorden met goede leren  
 Lijt deen des anders fouten, soo kent ghy v seluen.

Doen bestonden daer andere te claeghen swaerlijck  
 Alsoo my dochte, aen desen heere claerlijck  
 En zeyde tis altemael die schult der papen  
 Dat wy dus gheplaecht worden openbaerlijck  
 Met moorden, branden, roouen veruaerlijck  
 Dus moghen wy wel claghen helaes och wapen  
 Want zy zijn vol ghebreken met granten en rapen  
 En die Godts woort volghen, daer op zynse verwoet  
 Ghelijck hongherighe woluen nae die schapen  
 En dat om te versinnen donnosel bloet  
 Dus bidden wy v heere, met grooter ootmoet  
 Dat ghy haer vernielt als stinckende hoy-scheluen  
 Hy antwoorde soo my dochte, met reden vroet  
 Soude ick sulcx doen, dat en waer niet goet  
 Lijt deen des anders fouten, soo kent ghy v seluen.

Die Catholijcken bestonden weder te claghen  
 Sy en wouden niet doen naer des Paus behagen  
 Soo ghinghen zy roepen al seer yselijck  
 Dus deden wy na ruyters en knechten vraghen  
 Om sulcke rebellen wt ons Lant te iaghen  
 Want haer fouten waren seer afgrijselijck  
 Sy verleyden den simpelen dit is misprijselijck  
 Wy hopen ghy sult dit niet langher lijden  
 Hy antwoorden haer wederom seer wijselijck  
 Daer en hoortmen met ghewelt niet teghen te strijden  
 Dat oordeel coemt Godt toe, wilt ghy sulcx mijden  
 Want het quaet cruyt gaet uwen thuyn ouerweluen  
 Dus radick v voor tbeste wilt dat eerst wt wijden  
 Al eer ghy den anderen wilt benijden  
 Lijdt deen den anders fouten, soo kent ghy v seluen.

**Prince.**

Doende den wijsen Prince dees klachte hadde verstaen  
 My docht int antwoorden was hy wel beraen  
 Hy seyde, waerom wilt ghy dit malcander wijten  
 Want v eyghen sonden, die hebbent ghedaen  
 Dat ghy ghestraft wort hoort mijn vermaen  
 Waerom gaet ghy dan dus roepen en crijten  
 Ia verwoet als beeren die malcander bijten  
 Want elck siet dat caf in des anders ooghen  
 En den balck wilt ghy wt v selfs niet slijten  
 Hier door vint ghy v seluen bedroghen  
 Godts woort is waerachtich, ten heeft noyt geloghen  
 Dus bid ick v vriendelijck wilt doch bedeluen  
 V eyghen sonden, soo salt Godt wel genoghen  
 En doet als ick v raede, nae v beste vermoghen  
 Lijdt deen des anders fouten, soo kent ghy v seluen.

*Aensiet die Ionckheyt.*

*Schiedam.*

**Refereyn**

Christelijcke broeders religieuse sinnen  
 Wilt niet laten, soect den verloren te winnen  
 Verdraecht malcand', schout opgeblasen verstant  
 En denct hoe Christus met ons lijt wt minnen  
 Wilt met dienstbaerheyt alle dinck beghinnen  
 Weet dat Appollo begbiet, en Paulus die plant  
 Dus die op Christum voortbrengt vruchten abundant  
 Wil den Vader behouwen, maer sasl afsnoeyen  
 Wel tot zijnder tijt die boose rancken, want  
 Tot den tijt des Oogsts, sal tcaf werden verbrant  
 Soo lang ghebiet Godt, salment laten groeyen  
 Dus ist quaet in Gods Oordeel hem te bemoeyen,  
 Laet Gods dienaren, ten Oogst vergaren die scheluen  
 Denct wie staet mach vallen, dus wilt niemant verfoeyen  
 Lijdt deen des anders fouten, soo kent ghy v seluen.

Kent u seluen al sondaren te wesen  
 Laet schijn van deuchden gheensins werden ghepresen  
 Door Religieus ghebruyck, op Pharisenschen aert  
 Denct hoe Godt den Publicaen hadde wtghelesen  
 Die reyn wt den tempel ghinck, en verstaet by desen  
 Hoe den oordeelder dicmael hem seluen beswaert,  
 Dus als Christenen broederlijck by een vergaert  
 Elck ander verdraecht, en v seluen verheft doch niet  
 Lijdtsaemheyt onder een in liefden baert  
 Ouer niemant om tgheloof het oordeel verclaert  
 Het is Gods gaue, die de herten doorsiet  
 En wt ghenade, ons hier goet van Godt geschiet  
 Die zijn volck met zijnen gheest wil ouerweluen  
 Dus broeders toch alsoo ons Christus ghebiet  
 Lijdt deen des ander fouten, soo kent ghy v seluen,

Wilt malcander toch al vriendelijck lijden  
 Al sydy van Christo daer gheroepen bijden  
 Eersten Apostolische ghemeynte goet,  
 En siet ander iemant vanden duuel bevrijden  
 Niet van v complicien, sult daer in verblijden  
 Als Christus Ioannem gheboot, toch mede doet,  
 Wat niet tegen Godt is, is met hem dus handelt vroet  
 Denct hy seyt ick heb noch al ander schapen  
 Thangt aen Heyden, noch Ioden, maer aent Godlic gemoet,  
 Dus beueelt hem dien last, die goet en quaet hier voet  
 Laet hem v in gheen valsch oordeel betrapen  
 Wilt honich wt de bloem, en geen fenijn toch rapen  
 Om den verborghen schat, wilt in v acker deluen  
 Denct wat ghy noch zijt, en hoet u voor slapen  
 Lijt deen des anders fouten, soo kent ghy v seluen.

***Prince.***

Den Prince Christus can al ons fouten draghen  
 En heeft ons sondaren naer zijn behaghen  
 Alsoo malcanderen hier te lijden belast,  
 Oft sal den onnutten knecht een ander beclaghen  
 Diens schult vergheuen wert, zijn broeder met flagen  
 Af eysschen, hy siet dat hem zijn heer niet en verrast  
 Want Godt coemt alsmer dicmael alderminst op past  
 Dus al gheschiet ons quaet, wy moeten vergheuen  
 Daerom broeders int oordeelen v niet en vertast,  
 En acht v seluen oock niet al te weerden gast  
 Hy sal werden vernedert die hem heeft verheuen,  
 Dus laet alle goede herten v gaen beneuen  
 Inden wijngaert ghestuert ten achten en ten eluen  
 Soot den wijngaredenier behaecht wilt toch leuen  
 Lijdt deen des anders fouten, soo kent ghy v seluen.

*Aensiet liefde.*  
*Vlaerdingen.*

**Refereyn**

O curieuse werelt hoe sydy verblint  
 Met veel opinien, die in v floreren  
 Dies zy malcanderen soo hebben ghesint  
 Soo dat zy niet en doen dan condemneren,  
 Deen om de Vermony', dander om t'sacrificeren  
 Deen oordeelt de splinter, den Balck missende,  
 Dander swelcht den kemele, door s'vyants tempteren  
 Deen oordeelt tgeuoelen van een ander gissende  
 Dander wil zijn schanden zijn wtwissende  
 Door eens anders fouten vol malitie,  
 Elck is zijns naesten hert en moet hissende  
 Teghen malcanderen om een cleyn vicie  
 Dwelck voorwaer is gheen Religions exercitie,  
 Maer wilt ghy, dat u sulcx niet can ouerweluen  
 Lijdt deen des anders fouten, soo kent ghy v seluen.

Hoe moghen de menschen dus Curieus // wesen  
 Dat zy haer oordeel bouen Godt stellen,  
 Sal altijd het verdoemen de leus // wesen  
 Soo sullen zy ons selfs ter neder vellen  
 Want met wat maete zy wtmeten en relen  
 Met de selue sal Godt weder in meten,  
 Dus naeyt v seluen niet meer aen, tuyten met bellen  
 V rechueerdigende met een Phariseens weten,  
 Want Godt die daer hooghe is gheseten  
 Heeft sulcx altijd verboden warachtich,  
 Ia noyt met exempelen bewesen deurbeten  
 Maer wel het wederspelt hier van seer crachtich  
 Daerom wilt de liefde niet verdrijuen eendrachtich  
 Dan wilt ghy toonen gheen liefde te bedeluen  
 Lijdt deen des ander fouten, soo kent ghy v seluen.

Dat Godt ons lijt ende niet haest en verdoemt,  
 Can d'oude ende nieuwe testament bethoonen  
 Siet waerop Daidt anders heeft gheroemt,  
 Oock den vromen Manasses, sonder verschoonen  
 Magdalena, heeft hy oock niet willen hoonen  
 Maer met Petrus, ghenade bewesen  
 Zacheus wilde hy met barmherticheyt croonen,  
 Met noch veel meer andere soo wy lesen,  
 Volcht dan naer zijn rechte voetpaden ghepresen,  
 En laet curieuse sophisterije varen  
 Want van smenschen oordeel, can hy ons ghenesen.  
 En ghy brengt daer door u selfs int beswaren  
 Dus wilt ghy bewijsen te wesen Godts dienaren,  
 Met liefde ghetast als hooghe scheluen,  
 Lijt deen des anders fouten, soo kent ghy v seluen.

**Prince.**

Ghy Princen wilt oock altesamen ghedencken  
 Hoe onnoosel dat Christus zijn leuen liet,  
 Wie die waren die hem ghinghen crencken,  
 En wie dat hy was die hem verriet,  
 Daer en bouen, hoe alle zijn Apostelen siet  
 Hem begauen, daer zy op verscheijden tijden  
 Van hem soo menich sermoon hadden gehoord mz vliet  
 En soo veel mirakelen ghesien, t'onsen verblijden  
 Maer seght wat sprack hy toch sonder mijden,  
 (Verresen zijnde) tot zijn lieue Clercken  
 Seyde hy niet mijn Broeders vrede moet v beurijden  
 Sonder te verwijten haer velvluchtighe wercken  
 Die zy nochtans in verscheyden percken  
 Wel hadden gesien onder haer eluen  
 Lijt de een des anders fouten, soo kent ghy v seluen.

*Corrigez sans reproche.*

*Briele.*

***Refereyn***

Om vre op aerden met den anderen te houwen  
 Soo behoort deen des anders fouten te lijden  
 Want die hier lijdt, sal hem namaels niet rouwen  
 Die hem seluen kent, sal hem dicwils verblijden  
 En hy sal sien in toecomende tijden  
 Sonder strijden zijn vyanden verslaghen  
 Daerom laet ons toch ons seluer mijden  
 Op dat wijt hier namaels niet en beclaghen  
 Dus laet ons gheen twist int herte draghen  
 Teghens ons vyanden, want Godt salse verstreken  
 Als wijt minst ghedencken, soo sal haer Godt plaghen  
 Want men siet al die haet leet willen wreken  
 Ghemeynlijck de macht van Sampson ghebreken  
 Dus die verdraecht eer hy claecht, hoort mijn couten  
 Die kent hem seluen, en lijdt des anders fouten.

Al siet ghy v van een ander verdrucken  
 In fouten grootelijck laet hem begaen  
 Denct tsal noch qualijck met v ghelucken  
 Ick moetet lyen, en wijct dits mijn raen  
 Want Godt sal hem tot zijnder tijt wel slaen  
 Daer om doorsiet die Schriftuer en die ghemeen reen  
 Ghy sult daer in vinden hoort mijn vermaen  
 Datter niemant volmaect is dan Godt alleen  
 Want soo wie zijn eyghen conscientij gaet betreen  
 Die vint daer in genoegh, niet tot zijnder baten  
 Dus kent v seluen, twort v vermaent en gebeen  
 En wilt des anderen fouten in v hert haten,  
 Weest siende blint, slacht niet die verwaten  
 En laet elck loopden zijnen loop met verstouten.  
 Soo kent gyh v seluen, en lijdt des anders fouten.



Men siet dickwils sockelen en vallen  
 Die een anders fouten niet wil lijen,  
 Het brengt wel in droefheynt alsulcke Vassallen  
 Want hy moet dick zijn onwil hooren by tijen,  
 Dus kent v seluen wilt v van twist mijen  
 En set besijen al dat v mach deren,  
 Al gaet v eens anders fouten verblijen  
 Ia dat het v aenghinck, wilt altijd gheberen  
 Oft ghijt niet en saecht, soo salmen v eeren,  
 Want daer isser die haer vinden bedroghen  
 Die niet willen lijen, maer al van haer weren  
 Waer deur sy dicwils te cort zijn ghevloghen  
 Dus en toont nimmermeer al v vermoghen  
 Maer hout v gherust sonder v seer te verbouten  
 Soo kent ghy v seluen, en lijdt des anders fouten.

**Prince.**

Prince daer zijn nu en waren alsulcke lieden  
 In voorleden tijden als die Phariseen  
 Die haer eyghen broeders schier wilden gebieden  
 Om een caf van haer broeders cleeren ghemeen  
 Te doen, maer selfs warensen van bouen tot beneen  
 Bestouen, en dat saghen sy voorwaer // niet  
 Ghelijck Christus sprack, hy werp den eersten steen  
 Die sonder sond' is, terstont vluchten sy claer // siet  
 Tis best eens anders fouten te lijen dan verdriet  
 Dus alle twist vliet, en neemt dit int goede  
 Van die Nardus bloemkens, die const ons dit riet  
 Want het is gheschiet soo ick bevroede  
 Tot vreucht gheresen met fieren moede  
 Als oprechte minnaers quamen wy dit couten  
 En kennen ons seluen, en lijen eens anders fouten.

*Tot vreucht geresen,  
 Swartewaele.*

## Refereyn vande Violieren In nieuwen Koren.

Vvij Violierkens die const beminnen vry  
 Tspruyt wt ionckheyt is ons aduijs,  
 Prijs hopen wy te krijghen met moede bly  
 Ghy die in consten expert zijt en wijs  
 Neemt acht op de conste als een bloeyende rijs  
 Schout [...] oft schimpighe reden quaet,  
 Overdenckt den voorleden seer Propijs  
 Hoe Rethorica doen triumpheerde in heuren staet  
 By Maximilianus tijden, seer delicaet  
 Sijnde Hertoghe van Oostenrijck verheuen  
 Doen wasse in haren spoet den sin wel vaet  
 Door den goeden tijt diemen mocht beleuen,  
 Conste comt ons nu weder aen boort ghedreuen  
 Alleen twist en onconst willen wy bedeluen  
 Lijt deen des anders fouten, soo kent ghy v seluen.

O goeden tijt die nu zijt verdreuen  
 Deurt oorlochs gherucht, aen allen cant  
 In wat voorspoet heeftmen tNederlant sien beleuen  
 In voorleden tijt byden Graue van Oosterbant  
 Doen wast lant in rusten seer diamant  
 Willem die vierde oock seer lustich en wijs  
 Aelbrecht Hertoghe van Beyeren, vatet verstant  
 Was wel bekend, stout in orloghen propijs  
 Willem de vierentwintichste Graue deuijs  
 Hielt oock de Landen in rusten met goeder vreden  
 Doen mochtmen conste toonen met goeder gijs  
 Och goeden tijt ghy zijt al gheleden  
 Laet ons Godt bidden met vieriger beden  
 Dat hy den Tirant wil laten verweluen  
 Lijt deen des anders fouten, soo kent ghy v seluen.

Gy Carolus tijden waren de landen in vreden  
 Doen mochtmen conste toonen seer triumphant  
 Nv sidt onsen Coninck in swaricheden  
 Onder de Spaensche Inquisitie, deirlijck vermant  
 Waer door dat oock is verdoruen zijn Nederlant  
 Deur de Spaignaerden, fel aen alle zijden  
 Me vrou van Parmen quam met onverstant  
 En bracht aen allen cant, zijn Landen in lijden,  
 Ducq d'Alve den quant, quam oock bestrijden  
 Met zijn Spaens ghebroetsel ons Landen soet  
 Hy quam den Adeldom in felheyt berijden:  
 Als den Edelen Graue van Horen en Egmont goet,  
 Veruolgende dat Edele geslacht van Nassouwe vroet  
 Maer wt den Lande moest hy gaen steluen  
 Lijdt deen des anders fouten, soo kent ghy v seluen.

***Prince.***

Princelijcke Prince van Oranje crachtich  
 Machtich bloet van Nassouwen ghepresen  
 Ten desen, wilt ons toch zijn aendachtich  
 Gy uwer edelheyt, hooch wtghelesen  
 Onder uwe vleughelen willen wy bedect wesen  
 Als bescherm-Heer van onse Nederlanden soet,  
 Want v vroom hert is tot ons gheresen  
 In vroomheyt ghepresen zijt ghy zeer goet  
 Geuende dese schoone Landen eenen moet  
 Dies moetmen v lof geuen tot allen steden,  
 Wy Violierkens leuen in goeden voorspoet  
 Deurt Nassouwen bloet in goeder vreden  
 Prijs (segge wy) de Const-beminders, tis ooc wel reden  
 Schoon bouen alle bloemen, haer druylkens sweluen  
 Lijdt deen des anders fouten, soo kent ghy v seluen.

*Tspruyt wt Ionckheyt,  
 Nieuwenhoven.*

**Hier volgen de Lidekens inhoudende, Hoe het Nederlant eertijts  
ghefloreert heeft, ende hoe desolaet nu tselue leyt.**

**Op de wijze, Den lustelijcken Meye.**

O Nederlant, schoon en playsant  
 Verciert met schoone // steden, schoone steden  
 Seer trijomphant, besayt, beplant,  
 Vol nering en vrijheden // vrijheden  
 Maer laes voor dees weelde groot  
 Crijchdy Orloch ende aenstoot  
 Die spaignaerts v benouwen  
 O Mars wat condy brouwen // condy brouwen.

Meghem, Arenberch, [...] wreet  
 Met Gerlaimont, bloet ghierich // bloet ghierich  
 Dees zijn het merck, al van vleet  
 En hebben u schoffierich // schoffierich  
 In Duckdalfs handen ghestelt  
 En in der spaignaerden ghewelt  
 Dat zy v bederuen souwen  
 O Mars wat condy brouwen // condy brouwen.

Ducq d'Alue snel, roofvrijheit  
 Met strop, sweert, ende coorden // ende coorden  
 Achitophel, zijn raet wt leyt  
 Datment al sou vermoorden // vermoorden  
 Aman, hier in accordeert  
 Maer Godt heeft het niet begheert  
 Tsou wijf en kint berouwen  
 O Mars wat condy brouwen // condy brouwen.

Doort d'oorloch quaet, zijt ghy gheschent  
 Verbrant, huysen, en houen // houen  
 Die uwen staet, hebben ghekent  
 Gaen haer in u bedroeuën // bedroeuën  
 Maer wilt dit lijden verdult  
 Denct tis al verdiende schult  
 Israel wilt aenschouwen  
 O Mars wat condy brouwen // condy brouwen.

Ghy bedreeft meest, afgodery  
 Tlant was daer me beghoten // beghoten  
 Tghecroonde beest, dat diende ghy  
 Veruolchde Godts ghenoten // ghenoten  
 Al u wachters waren blint  
 Stomme handen, slapens ghesint,  
 Gods woort zy niet ontfouwen  
 O Mars wat condy brouwen // condy brouwen.

Maer maghet schoon, Godt heeft verhoort  
 V kermen ende claghen // ende claghen  
 Sent v tot loon, zijn Godlijck woort  
 Dus scheidt daer in behaghen // behaghen  
 V vyanden hy verdrijft,  
 Die daer veel hebben ontlijft  
 Soo mannen ende vrouwen  
 O Mars wat condy brouwen // condy brouwen.

Lof Prince goet, die ons beurijft  
 Van t'iock der spaenscher honden // spaenscher honden  
 Die ons verwoet, leuenden strijt  
 Maer d'orsaeck zijn ons sonden // ons sonden  
 Ons vyanden Heere beschaemt  
 En ons met minnen versaemt  
 Op u staet ons betrouwen  
 O Mars wat condy brouwen // condy brouwen.

*Liefd' baert vrede.  
 Rotterdam.*

**Een nieu Liedeken,**

**op den voys Bedroeft herteken, wat moet ghy lijden.**

Hoe soudē wy connen leuen in vreden  
Ons worden ghenomen goet en pant,  
Deur dat wy hebben Chriostum vertreden  
Sijn wy ghecomen in groote schant.

Soo langh als Adam was obedientich  
Gods gheboden oock allegaer,  
Doen was hy oock seer excellentich  
Met vreden in het Paradijs voorwaer.

Maer door ons sonden comen wy in sneuen  
Om dat wy walghen van tHemels broot,  
Ghelijck den wint gaen wy nv leuen  
Waer door wy comen in grooten noot.

In weelden en costen wy ons niet houwen  
Nu moeten wy leuen int verdriet,  
Dus laet ons noch op Godt betrouwen  
Want Godt de zijne noyt en verliet.

Die Israheliten waren in rusten  
Soo langhe sy kende haer ouerhoofd,  
Soo langhe sy na Gods ghebot lusten  
En waren sy niet van vreden berooft.

Door onse sonden zijn wy in sneuen  
Ghecomen al in groot dangier,  
Dus moghen wy wel van sonden beuen  
Ende blijuen vast op Christum fier.

Hoe wel dat dese Nederlantsche affectie  
 Was in zeer goeden staet,  
 En brochten alsoo groote dilertie  
 Maer na quamen sy om eyghen baet.

**Prince.**

Prince wilt v alle met vreden spoeyen  
 Soo worden wy met Israhel verblijt,  
 En alle sonden van ons doen vloeyen  
 Soo comen wy in vreucht ende lolijt.

*Daet sonder Roem.*

*Rotterdam.*

**Lideken**

**op de Voys Al waer ick half doot.**

O Hollant onversaecht  
 Ghy leeft nu wel in vreden,  
 Nu dat ghy hebt veriaecht  
 Die u wouden vertreden,  
 Met haer tirannich-heden  
 Waren vermoet // te storten bloet  
 Maer Godt die heeft v daer gans voor behoet.

Ghy worden oock gheschat  
 En moesten thienden penninck gheuen,  
 Eer dat ghy orloch hadt  
 Daer Duckdalf af moest leuen,  
 En die zijn nu verdreuen  
 Dat Spaens ghewelt // die om het ghelt  
 V al dees langhe tijt hebben ghequelt.

Die ongherechtigheyt  
 Die is nu wt de landen,  
 En al v majesteyt  
 Die coemt v weer ter handen  
 V ghelt v goet v panden  
 Dat op dat pas // vermindert was  
 Dat sal v van Godt weer toe vloeyen ras.

Al die afgodery  
 Hebt ghy nu wech ghecreghen,  
 Nu mach elck leuen vry  
 En wandelen in Godts weggen  
 Dat wel eer moest zijn versweghen  
 En bleef versmoort // dat comt nu voort  
 Het welck is die waerheyt onghestoort.

O Princelijcke macht  
 Die ons heeft gaen bewaren,  
 En benomen haer cracht  
 Die ons ghinghen beswaren,  
 Lof, O Heer der Heerscharen  
 Die ons in vreen // hout al ghemeen  
 Dorpen, Sloten ende daer toe Steen.

*Hope troost my,  
 Rotterdam.*



**Een nieu Liet,****opden voys Gheen lust noch pijn, mach een amoureu herte, &c.**

Lvstich plaisant // was in zeer groot vermeugen  
 Dat Nederlant // als zijn heer daer floreerde  
 Seer abundant // om den gheest te verheugen  
 Datmen daer vant // voor elck een diet begeerde.  
 Vrientschap in allen steden  
 Dat sy malcander deden  
 Leuende vry met vreden  
 Door Godes macht // sachmen wonder beginnen  
 Want Godt eendracht // altoos hier sal beminnen.

Neringhe daet // den coopman frequenteren  
 Met ouervloet // als doen wel was beuonden  
 Quam ghelt en goet // dat dede dommeren  
 Met blijden moet // soo waren daer ghesonden  
 Die schepen vol gheladen  
 Om dat lant te versaden  
 Oock waren vry die paden  
 Voor den coopman // die sulcx was gheleghen  
 Daer menich van // hare welvaert vercregen.

Niet dan accoort // doen onder alle nacij  
 En was ghehoort // van nering dat sy spraken  
 Elck een bracht voort // lustighe recreacij  
 Men riep gheen moort // den crijch dat sy verstaken  
 Den huysman wat hy wilde  
 Vercreech daer hy met stilde  
 Den borgher als een ghilde  
 Doen ter tijt was // den zeeman al te voren  
 Niemant belast // gheschat was, noch gheschoren.

[...]

[...]

[...]

En men is quijt // peys want die leyt ghebonden  
Den huysman mach niet houen  
Den coopman wert verschouen  
Den zeeman doen berouen  
Die muyterye // dagelijcx nu op-rechten  
En door invye // voeren Ruyter en knechte.

**Prince.**

Princen eens siet // hoe sy dat Landt bederuen  
Daer en gheschiet // nu gheen rechte Iustici  
Maecken tot niet // die huysen ende eruen  
Godt oyt toe-liet // sulcx tot eens lants punici  
Dus soo wilt v bekeeren  
En bidt den Heer der Heeren  
Dat hy v wt tverseeren  
Toch eens verlost // en zijn graci wil gheuen  
Want theeft ghecost // soo menich mensch zijn leuen.

*Aensiet die Ionckheyt,  
Schiedam.*

## **Een nieu Lideken**

### **op de wijse Goe goet is Godt van Israel.**

O Nederlandt seer soet  
Hoe placht ghy te floreren  
In weelden en voorspoet  
Soo sachmen v heerlijk domineren  
Ghy hadt van als planteyt  
V en mocht niet ghebreken  
V beesten ver'gheweyt  
Daer wistmen af te spreken  
Van als was v bereyt  
Door Godt almachtich soot ons is ghebleken.

Vrede was doen int landt  
Orloch die lach gheuanghen  
Solaes aen elcken cant  
Daer toe een ieghelijck hadt groot verlanghen  
Men sach die Rethorijck  
In dese Lande bloeyen  
Oock mede de musijck  
Seer constelijcken vloeyen  
Daer was noyt haers ghelijck  
Van Conste alsmen doen wel mocht bevroeyen.

Maer desen soeten tijt  
Die is nv heel verloren  
Daer is nu haet en nijt  
Het volck gaet haer op elck ander verstooren  
Die liefde is heel doot  
Eendracht wort nu verschouen  
Aldus coemt ons den stoot,  
Dat hem elck mach bedroeuē  
Daer isser veel in noot  
Men siet te hans het kint den vader beroouē.

O Prince, eeuwighen Godt  
 Wanneer sak u erbarmen,  
 Dat ghy dit quaede Lot  
 Van ons sult nemen door u goet ontfermen,  
 Wy hebben langh verbeyt  
 Met grooter treuren clachtich,  
 Aensiet doch die ioncheyt  
 Door v ghenade crachtich  
 Sent ons met goet bescheyt  
 Den Peys door v Goddelijck woort warachtich.

*Aensiet die Ionckheyt.  
 Schiedam.*

## **Een nieu Liedeken,**

**opden voys Ontbint den geest, in die foreest, sচেয় melodye.**

Schoon Nederlant // in v men vant  
 Eertijts Mekodye,  
 Aen elcken cant // men vreucht ontbant  
 Sonder envye  
 Den Coopman vroet, was wel ghemoet  
 Hy wan ghelt en goet  
 Den ambacgtsman mede,  
 Godt gaf in ouervloet  
 Met Peys en vrede.

En den Landtman // wasser wel an  
 Gheschat noch gheschoren,  
 Godt hem hier gan // als dat hy van  
 Sijn acker creech Coren,  
 t'Suyuel gout ghelt

Vanden crijch onghequelt  
 Seer rijck van hauen  
 Nu wert hof en huys ghequelt  
 En Ian moet grauen.

Eens mochten vry, die schepen by  
 Van oosten en westen  
 Comen die bly // op haer ghety  
 Brachten ons ten besten  
 Coren ende wijn, Gout en siluer fijn,  
 Van als voor elcx aenschijn  
 Den Seeman mocht vaeren  
 Sy trocken eene lijn  
 Al die daer waeren.

Maer nu siet, ist al strijt en twist  
 Watmen hoort spreken  
 Door schalcken list ghelijck den mist  
 Wert tlant verstecken  
 Ede berooft van zijn heer zijn hooft  
 Die heeren verdooft  
 Achten gheen claeghen  
 Deen dander niet en ghelooft  
 Tvalt swaer om draeghen.

Van brant en moort, princen nieu hoort  
 Tcost menich tleuen  
 Op elck oort, berooftmen voort  
 Wat daer is ghebleuen  
 Elck een toe tast, spijs en dranck men belast  
 Al met schattinghe vast  
 Huys, hof, lant en eruen  
 Dus werden wy verrast  
 Tlant moet bederuen.

*Aensiet die Ionckheyt.  
 Schiedam.*

**[Hoe hebt ghy gefloreert]****Op de voys, Al waer ick half doot.**

Hoe hebt ghy ghefloreert  
 Eel Nederlantsche vrouwe,  
 Eer van v was gheweert  
 V heer die ghy waert trouwe,  
 Ghesteenten ende gouwe  
 Men vant by u in ouervloet  
 Oock alle goet  
 Datmen (Godt betert) niet meer en doet.

Die schepen wt Turckijen  
 En wt Indien mede,  
 Mochtmen gheladen sien  
 Comen in menighe stede,  
 Als ghy daer saet in vrede  
 Van Oost en West quam u die vloot  
 Daer cleyn en groot  
 Aen wan seer heerlijcken doen zijn broot.

Dat den Lantman besayt  
 Hadde, mocht hy vry sacken,  
 Nu wert het gron ghemaeyt  
 Hoe salmer dan van backen,  
 Die peerden sietmen voor smacken  
 Die v Heer hebben wech ghehaelt  
 Godt toch betaelt  
 Die oorsaeck zijn dat die ghemeynte dwaelt.

Eens mocht den ambacht man  
 Voor zijn kinderen winnen,  
 Dat hy nu niet en can  
 Maer met verstroyde sinnen,  
 Moet crijch leeren beghinnen  
 Den rentenier wert seer belast  
 Den coopman vast  
 Te Lant en See ouer al aenghetast.

Men siet nu tplatte lant  
 Gheheelijck onder drucken  
 Het wert gherooft, ghebrant  
 En gheslaghen aen stucken  
 Men sieget teesen en plucken  
 Diuersche onder sconincx naem  
 Heeten eersaem:  
 Godt betert, het gheschiet heel onbequaem.

Nu den heere achter blijft  
 Moeten daer veel regieren  
 Elck om t' meeste schrijft  
 Scheeren in veel manieren  
 Die schaepen en versieren  
 Vonden seer cloeck met schalcker list  
 Om hare kist:  
 Te vullen, waer wt dat rijst een grooten twist.

***Prince.***

Prince Godt wilt eer heer  
 Verleenen wijs en machtich,  
 Het doet het lant te seer  
 Dus veel heeren waerachtich  
 Zijt v volck eens ghedachtich,  
 Stelt doch tlant in zijn oude graet  
 Dat qualijck staet:  
 Ghy zijt o Godt haer troost en toeuerlaet.

*Aensiet liefde.*  
*Vlaerdinge.*

**Een nieu Liedeken.****Opde wijze, soot beghint.**

O Nederlant schoon  
 Hoe machman v volprijsen,  
 Ghy spant die croon  
 Soomen wel can bewijsen,  
 Al inde werelt wijt  
 Maecte ghy groot iolijt  
 Deur neringhe ghedreuen  
 Die t'aller tijt  
 V heeft subijt // verheuen.

Waerom dat ghy soet  
 Hebt geregeert seer crachtich,  
 Wijs ende vroet  
 Bouen alle volcken machtich,  
 Met goede policy  
 Soo toonde ghy v vry  
 Als de wijt vermaerde  
 Dies u elck bly  
 Sonder ialousy // aenuaerde.

Spaignien vaillant  
 Poortugael en Noorweghen,  
 Vrancrijck en Duytslant  
 Hebben van u vercreghen,  
 Als Polen ende Sweden  
 Met Persen en oock Meden  
 Rijckdom en constighe wercken  
 Dies men v seden  
 In alle steden // can mercken.



In triumphen fray  
 Ende ghebouselen cierich,  
 Toony ghy v gay  
 Met allen seer manierich,  
 Ghy waert oock seer volck rijck  
 Vol consten en practijck  
 Bequaem tot alle saecken  
 Soo dat niet ws ghelijck  
 Sonder beswijck // en is te raecken.

Maer o Heere Godt  
 Hoe qualijck soutmen gheloouen,  
 Dat ghy zijt tot spot  
 Van veel die u beroouen,  
 Van lijf en oock van goet  
 Met wreetheyt soo onsoet  
 En maeckent al tot schanden  
 Dat ghy met spoet  
 Hebt ghewonnen vroet // met u handen.

V Palleyzen al  
 Sietmen nv ruineren,  
 En oock comen ten val  
 De neringhe deur t'raseren,  
 Van Mars die ons alsnoch  
 Dreyghende is deur bedroch  
 Van ghiericheyt, een verseeren  
 Vande armen, dus roep ick och  
 Heer wilse toch // bekeeren.

Alle consten groot  
 Sijn nu van u verscheyden,  
 Weluaert leyt doot  
 Niemant wil t'ghewelt verbeyden,

Dies ist daer desolaet  
Meest door de eyghen haet  
Alle dees Nederlanden  
Elck stelt zijnen staet  
Inden hoochsten graet // vol schanden.

Ghy Princen al hier  
Die wt ionsten nu versamen,  
Laet v dees manier  
Ten goede zijn, tuwer vramen  
Veriaecht oock Momus fel  
Met Zopelus opstel  
Want wy seer voor dees schromen  
Maer als vrienden wel  
Weest niet rebel // der vreuchden blomen.

*Corrigez sans reproche.  
Briele.*

**Een nieu Liedeken,  
opde Wijse Den Lustelijcken Mey is nu, &c.**

Die Nederlanden schoon  
Wel eer de bloem  
Van Christenrijck vercoren,  
Waer is de croon  
En u hooghen roem  
Doen ghy Vrancrijck ghinct verstooren,  
Van ons Keyser wel ghemoet  
En deur Sorgongen metter spoet:  
Sachmen die Nederlanden floreren  
Die men nu siet destrueren.

Carolus ons oprechte Erf-Heer  
Sachmen wt Spaignen comen,  
Om eenen twist van Ghent  
Te legghen ter neer  
Maer nu moghen wy wel schromen,  
Dat ons edelen Coninck fier  
Niet en mach comen hier  
Om zijn Landen te bevrijen  
Van bederf aen allen zijen.

Doen ons Keyser coen  
Onder Sorgongnen bracht  
Den Geldersen hoomoedich,  
In Nederlant was doen  
Liefd' en eendracht  
Dat nu wert begoten bloedich,  
Onder malcander aen elcken cant  
Deur tiranny vanden Spaenschen quant  
Ia wy maken gen gherechte eruen  
Om Nederlant te verderuen.

Doen Sorgongnen met Vranckrijck  
 Maecten peys  
 Wast al verblijt in dees Landen,  
 De blijde [...]  
 Na die reys,  
 Dat nu al zijn vyanden,  
 Want men soect nu anders niet  
 Dan goet bloet, en verdriet  
 Dat moghen wy wel beschreyen  
 In dees Nederlantsche contreyen

Princen en Princerssen  
 Cleyn ende groot,  
 Dit is die Nardus bloemkens bede,  
 Dat ghy bemint  
 Godt woort minioot,  
 En houden eendrachtighen vrede,  
 Soo moghen wy die vyanden fel  
 Verdrijuen wt ons landen wel  
 En vercrijghen peys ghepresen  
 Met hem tot vreucht gheresen.

*Tot vreucht geresen.*  
*Swartewael.*

## Een nieu Liedeken tot lof van Rethorica,

### Opde wijze Wel aen schoon lief ghepresen.

Waect op ghy Edel gheesten  
 Wilt inde Const voleesten  
 En soo sulde ghy scheppen vreucht en Iolijt  
 Sy is een vande meesten  
 De waerheyt wil zy queesten  
 Ende dat in spijt, van alle diet benijt,  
 Dus met des Consts vyanden strijt  
 En toont v vroom in swerelts crijt  
 Soo worden wy verblijt.

O conste weert ghepresen  
 Wt v is meest gheresen  
 De waerheyt, diemen nu alomme openbaert  
 Daerom suldy mits desen  
 Ock niet slaperich wesen,  
 Maer thoonen altijd v conste wijt vermaert  
 Volhert toch vrij, zijt onvervaert  
 Ghebruyct altijd der consten aert  
 Want wy met v zijn ghepaert.

Ghy leert ons componeren  
 Lustich Ortigrapheren  
 En met schriptura schoon, maken wy oock solaes,  
 Fraey doet ghy ons ageren  
 Schoon consten inuenteren  
 Door de Poësy van veel veracht eylaes  
 Philosophy door s'gheests gheblaes  
 Sticht oock sonder te maken dwaes  
 Al meynent vele met gheraes.

Godes woorden vol trouwen  
 Deet ghy seer fraey ontvouwen,  
 Ontdeckende alsoo des Antechristus staet,  
 Waer door mannen en vrouwen  
 Op v stijf ghingen bouwen  
 Als die ghefondeert vonden, uwen schoonen praet,  
 V Edel wesen en ghelaet  
 Verquict menich hertken delicaet  
 Dat bedroeft is en versmaet.

Ghy Princen ende Heeren  
 Al die dees Conste eeren  
 Neemt in danck, ons simpel, slecht, vermaen,  
 Wilt altijd neerstich leeren  
 En al sonder verseeeren  
 Castijt sonder verwijt, soo wy ons ontgaen  
 Van all' afgonst vliet nu seer saen  
 Ter eeren de const is dit ghedaen  
 Om v vant quaet te raen.

*Castyt sonder verwyt.*

Finis.